

兩垣奏議  
摘要疏草  
伯仲諫臺疏草  
敬修堂釣業



叢書集 成

初編

主玉編雲五者

商務印書館發行



兩 垣 奏 議



撰 立 中 達

本館叢書集成初編所選借月  
山房彙鈔澤古齋重鈔及指海  
皆收有此書且同一版本借月  
在先故據以排印

欽定四庫全書提要

兩垣奏議一卷明遜中立撰中立有周易劄記已著錄是書凡奏議六編皆中立爲給事中時所上以歷官吏兵二科故稱兩垣其中論公用舍論修史用人及論會推閣臣三疏本末略具明史本傳蓋中立以是三疏一忤旨停俸一見忌輔臣一被貶外授故明史具錄於本傳其請罷織造論倭患及請停例金三疏雖事不施行然亦皆錚錚不阿無愧封駁之職不得以卷帙之少廢之矣舊本附刻中立所作周易劄記後今既分隸四庫則列於經部不倫故析出別著錄焉

50188

003  
1124  
2:512

兩垣奏議提要

一

# 兩垣奏議

## 論公用舍疏

明 遼



臣惟朝廷有用舍之權。而天下有是非之公用。用舍合於公。則人服而議論自息。用舍不合於公。則人不服而議論日滋。故曰王道本乎人情。自古從未有上下異指。大小異心邪。正倒置。衆論沸騰。而以此言治者。臣睹近來諸臣相繼而罷者。率多砥行好修。守正不阿之士。如郎中譚一召疏中所云。得罪棄置者。六十餘人。臣不敢謂其皆皭然君子。然而爲君子者多也。而偶以一事固執。一言觸忤。遂令其牢落。下僚跼伏。田間壯志紓而不伸。忠猷蘊而未竟。此臣所以深爲諸臣惜也。方今中外多故。苦無任事之人。而今被斥諸臣。雖位有崇卑。才有偏全。皆國家所作養。生平所砥礪。今不使之爲國家用。而反令藉之以成其私名。致感時者有憐才之嘆。司銓者有乏才之憂。此臣所以深爲世道惜也。夫諸臣有以爭國是而去者。有以詆輔臣而去者。又有以申救株連。疑及輔臣而去者。陛下怒言者。則曰出朕獨斷。而輔臣王錫爵之自解。亦曰有主上親筆。臣謂罷者非正人也。則斷自宸衷。固主上去邪之明。卽擬自閣臣。正大臣爲國之忠。若罷者果正人也。出于閤臣之票擬而有心斥逐者。爲妬賢。出于主上之裁決而不能匡救者。爲竊位。彼職贊密勿。身膺隆眷。不補牘力爭。而坐視忠良屏棄。譏佞鴟張。雖間有掲救。然而諸臣之擅斥者如故也。大臣以人事君之道。恐不如是。故臣又深爲輔臣惜也。今陛下欲安輔臣。則罷言者言者罷而論者愈多。

論者多而輔臣益不自安。卽如高攀龍一疏，惓惓爲國惜才，卽部院大臣亦許其願忠之心矣。中外諸臣亦多爲之申解矣。孫繼有譚一召之疏，不無過激，而扶正抑邪之言，不無可採。陛下重罰二臣，以謝輔臣。二臣罰而輔臣能自安乎？臣聞防口甚于防川。聖如虞舜，猶察邇言而用之。況秦交一疏，輔臣不以淹棄。諸臣請乎陛下，以心膂托輔臣，則何不行輔臣之言？從中外臣工之願，明諭吏部于先後廢謫諸臣，隨材錄用，以示大公。則君有容直臣之名，臣無敢言之譽。國家收多賢之益，廟堂無處分之煩，衆黨自息，輔臣自安矣。宋劉安世曰：愛惜人才，乃人主自爲社稷計。程顥曰：朝廷不失於舉措，使議論何名而沸騰？釋羣疑而收人心，莫要于此。然臣又有言焉。留都銓卿以沈鯉推而不用，尙寶司丞以李懋檜補而不允。至于鄒元標慷慨大節，海內屬目，而不能一日立朝。夫以陛下寬仁，獨不能容一二直臣乎？以輔臣見知于主，獨不能爲國用一二直臣乎？端人短氣，正士結舌。清明之朝，不宜有此。輔臣不思竭力叩闈，仰回天聽，以收民譽，而樹令名，而徒忿衆口之呶呶，以歸過于君父。此臣所以義激于中，不容默默也。臣一介草茅，蒙拔貢吏垣，感時效愚，罔知忌諱，伏惟聖明裁納。

請罷太和山織造疏

臣待罪諫垣，竊見傳造太嶽太和山各宮殿頂帳費以萬金，奉旨本山量解香稅銀七千兩，仍命工部補足三千兩矣。又戒諸臣之奏擾矣。夫以供奉明神，而費止萬金，又有明旨之凜凜也。臣何敢復有陳說？第考之祀典，參之時勢，則見織造之命，萬萬可已者，敢披瀝爲皇上陳之。臣惟太和山不列于嶽鎮，元武神

不見于經傳。所云靜樂王太子入山修煉。白日飛昇。皆道家博會之說。儒者不談。雖我朝廟宇設提督。以崇祀之。然非若天地嶽鎮海瀆等神爲祭之正也。古云讚于祭祀時謂弗欽。禮繁則亂。事神則難。而況宮殿帷帳。又供奉之彌文。而非祭祀之常經乎。故織造之可已也。爲國家釐祀典也。東南災沴頻仍。杼柚其空。卽袍服上供。撫臣無歲不請減。請罷矣。今又以頂帳之故。嚴行新舊各堂添設。機張人匠併工織造。手指瘁于拮据。皮肉殘于鞭朴。且吏胥有需索之擾。州縣有徵解之苦。費以萬金。而閭閻所費又數倍于此者乎。夫以東南凋敝之時。而何忍加之以額外之征輸也。故織造之可已也。爲東南愛民力也。王者爲天下守財。卽財賦殷富之日。猶當加意撙節。而況公私交困。府藏殫竭。昨見主計之臣。謂各邊鎮上半年例銀共該一百四十餘萬。東那西湊。尙少一半。若太和山宮殿頂帳。何益于神。而出帑金以佐之。雖曰數止三千。然一銖一兩。孰赤子之膏脂乎。是何取盡錙銖。而用若泥沙也。故織造之可已也。爲帑藏惜財用也。方今徐淮兗豫之間。千里一壑。積骸盈野。仳離之狀。愁嘆之聲。慘目悲心。有不忍見且聞者。昨河南撫臣張一元之疏可見矣。天下之患莫大于下有疾苦。而上不收卹。乃日者科臣王德完爲民請賑疏。兩上而不報。今頂帳無益之費。近習無稽之言。卽以科臣部臣執奏而不允。此臣之所未解也。臣謂太和山之香稅。積之徒以供內臣之乾沒。推之可以救中原之捐瘠。織造之萬金。以爲頂帳之費。則曰不經。以爲賑濟之資。則曰德意。臣又查萬曆十四年。以山陝等處災傷發帑金三十九萬十七年。以江南等處災傷發帑金三十萬兩。遺官分賑。今中原災傷。不減于曩時。而賑卹之惠。反嗇于曩時。皇上爲民父母。忍視

數百萬生靈嗷嗷待斃而不爲之拯救者乎。伏願亟停織造之命，卽以太和山香稅銀一萬兩，并再發內帑銀二十萬兩，遣廉能之官，宣布德音，大需皇仁，以示聖天子軫念災民之意，則罷不經之費，至儉也。宏賑卹之恩，至仁也。廓轉圜之量，至明也。皇上何憚而不爲此？然臣又有言焉：京師者，四方之極也。今都門外宮觀之侈，丹堊輝煌，旛幔之飾，綦組絢爛，而委巷小民，至傾貲破產，以修庵觀，而供齋醮，異說之惑世誣民甚矣。皇上又復括已盡之財，剝窮民之脂，以供宮殿帷帳之飾，則何以禁止愚民，風示四方？孟子曰：「楊墨之道不息，孔子之道不著。」又曰：「君子反經而已矣。」經正則庶民興，庶民興斯無邪慝矣。明正道以息邪說，惟聖明留意焉。

論倭疏

自倭寇未靖，而請封請貢之說興也。中外諸臣言者甚夥，其揣情形、析利害者亦甚備。雖三尺豎子亦知其不可矣。臣卽再陳設，亦不能加于諸臣上矣。顧是說也，宋應昌始之，顧養謙成之，本兵石星力主之。沈惟敬密計於倭寇，劉黃裳昌言于朝，請封易而爲請貢，請貢易而爲開市，開市易而爲和親，頃又專易請封。業已奉有明旨矣，臣竊惟貢不可許，而封亦不可許也。是東征諸臣誤本兵，而本兵因以誤國也。臣始不能無言也。臣聞忠臣之謀國也，爲國家計，不爲一身計；爲久遠計，不爲旦夕計；自倭寇狂逞，盤據朝鮮，我皇上宵旰憂勞，爲之遣將出師者，既一年餘矣，蹂躪我屬國，戕殺我士卒，糜費我金錢，是中國仇也，而臣子之羞也。今不思滅此朝食，而反欲寵以封號，金冊銀章，赫奕島外，此可令四邊見乎？以國體論，則倭

不當封。昨見朝鮮疏中有云。倭寇築城蓋房。運糧練兵。陽退而復進。假和而逞兇。倭之情狀亦可槩見。而當事者以爲難憑。日夜催促表文。以冀了事。目前臣未聞空言可以畏敵。表文可以守取。卽稱臣稱貢。禮卑言甘。臣之所不敢信也。以倭情論。則倭不必封。倭俗狙詐而狼貪。聖祖絕其貢。不與通。著之爲訓。沿海設備。嗣是屢貢屢犯。至嘉靖間。東南之慘極矣。世祖赫然用武。一大創之。而有三十餘年之安。今無以制其死命。而以封爲羈縻。彼關酋雄長海外。卽稱帝稱王。夫誰禁之。而乃遣數十萬之師。犯我屬國。丐此虛名也。勢必請封。請市要求不已。我不能拒絕于今日。而安能拒絕于異日。啓奸民勾引之端。開外國窺伺之門。爲國家患無已時。以利害論。則倭不可封。此其事之可否得失。滿朝臣工知之。朝鮮知之。而何當事者以冥冥決事。不曰選將。不曰練兵。不曰沿海修備。而今日議封。明日議貢。倭盤據于釜山。爲攻取之計。我冀望于僥倖。爲苟且之謀。倭以款要我。而操術常行于款之外。我以款自愚。而智慮常陷于款之中。排盈廷之公論。損戰守之長策。沮忠臣義士之氣。爲逃責議功之資。此人臣之利。非國家之福也。旦夕之謀。非久遠之計也。豈不羞朝廷而汙青史哉。臣謂倭款不罷。則戰守之計不決。則釀禍將來。貽憂君父。異時追尤首事。卽斬諸臣之頭。不足以謝國事矣。且皇上獨不見西事乎。當互市之始。豈不藉口羈縻。得以息肩飭備。而今邊事廢弛。將士之惕。不可收拾。識者恨之。今日又欲製其故智。以爲退倭良策。尙可謂國有人乎。伏望皇上深思倭情之叵測。收回許封之成命。明諭尙書石星、總督顧養謙。閉關謝使。一意守禦。毋推諉避事。毋因循養亂。毋狃一時之便。而貽後日之悔。侍郎宋應昌、郎中劉黃裳。併亟賜

罷斥仍正其欺罔誤國之罪。則內外遠近曉然知上意所向，在于安攘大計。孰不更相激厲以圖事功。所謂三軍之士不戰而氣自倍。倭何足慮哉。

論修史用人疏

先該輔臣王錫爵題請纂修正史。起原任詹事劉虞夔充總裁官。輿論噴噴以爲非人臣曰。是輔臣援所私而不顧天下之公議也。方具疏參論。旋聞同官業已上請。竊謂輔臣必聞言而悔。滌心而聽。則臣可無言矣。旣奉旨。先該呂坤保薦劉虞夔急宜起用。今御史紛紛參駁。孰爲公論。著該部院定議來說。欽此。臣仰見皇上深居大內。留神章奏。采公論于外廷。付定議于部院。而毫不以成心與也。繼而思曰。是出于宸衷之主裁與。則呂坤保薦事在往年。猶然簡在聖心。虞夔何人。而當此隆眷也。抑出于閣臣之票擬與。則是以桃李之私情。謬相推引。而今何假呂坤之一薦。以自文也。臣請得而畢其說。撫按之臣。鎮緝一方。境內士夫所改容而禮者也。非巨奸豪宦。不以列彈章。其薦人也。不得不嚴。撫按之保薦。或偶取其鄉論。廟堂之起用。必詳核其官評。試查各處撫按所薦舉地方人才者。能人人而用之乎。彼虞夔生平具在。去歲拾遺疏中。眞士類所不齒。聖世所不容者。不卽罷斥。已爲漏網遺奸。此固滿朝公論。輔臣獨不知乎。知之而何故復用之乎。夫用虞夔也。爲得意門生而私之也。私虞夔而借明旨以塗天下也。借堂官以箝臺臣也。則黨護之心化而爲機械。黨皇上試召輔臣而問。不知輔臣何詞以對。且今天下多故。需人甚急。廢謫諸臣。無

賜環之日，中外士紳日夜望輔臣補牘力爭。今未能進一君子，而先進一邪臣。輔臣又將何詞以謝天下乎？伏乞明諭輔臣，以後用人當秉公心，勿植私黨。以後擬旨，當持大體，勿挾私見。則國家之休也。亦所以成輔臣之令名也。臣再惟修史鉅典也，必博訪名流，廣招俊士。前輔臣疏有欲取之別署，取之外僚，取之間廢，取之山林隱逸，而必曰文行兼優，又曰行義無虧。然邪媚如虞夔者，首與總裁之選矣。第恐天下之爲虞夔者不少也。汙行無節，徒飾浮華之詞，夤緣干進者亦不少也。儻誤蒙收錄，則修史之典適以啓邪臣奔競之途，而開小人仕進之竇耳。卽掇英摛藻，何足以昭法誠，而垂萬世哉？復望諭輔臣及吏部嚴行諮詢，務求端方直亮，博聞有道術之士，毋得濫及匪人。以汙清朝盛舉，則仕路肅清，而國史可傳不朽矣。

請拔淹滯停例金疏

臣待罪諫垣，伏睹陛下寤寐英賢，軫恤民瘼。邇者如孟一脈沈鯉屢推不允者，今擢用矣。覽科臣所上中州饑民圖說，憫然動念，發帑金，遣官賑救，至宮闈之內，亦捐金佐之矣。大小臣工，莫不踴躍而頤曰：「陛下天地之量，而堯舜之心也。」顧臣見近來請用廢謫諸臣，連章累牘，留中不下。夫今天下多事，正當廣招俊乂，搜羅巖穴。而諸臣者，往往以憲直蒙譴，其抱效忠之悃，具可用之才甚多也。一列摈斥之籍，永無登進之階。是陛下之量猶有未廓與。臣謂天地之生才實難，國家之需才甚急。諸臣不及時錄用，恐歲華相催，精神意氣漸隳。是清朝有不盡之才，而正人有後時之嘆矣。且銓臣爲陛下用人也。尙書陳有年，又陛下所特簡者也。以請用司屬奉旨切責，累疏求去。陛下亦屢降溫綸，留矣。夫畀以銓衡之寄，寵以知眷之渥。


則何不推心委任盡行其志而乃令其抱牘逡巡有懷莫展也伏乞明諭吏部于先後廢謫諸臣遇缺次用隨材序遷則忠直在列而國家收多賢之益矣臣又見昨該雲南撫臣請減加金未蒙俞納夫雲南年例金歲止二千兩萬歷二十年加至五千兩是加增之數反多于原額旋以閣臣之請減去一千矣又以撫臣之疏而旋增以計臣之請復減一千矣又以科臣之疏而增隨減隨增綸綺不信非所以重詔令而垂史冊也臣聞滇南採金遠涉川陝風雨瘴癘之所侵虎豹盜賊之所傷辛苦艱難觸目悽慘是金以千計而民間所費與死亡傷夷者不可勝計也陛下居高處優言千則千耳獨不念供之他甚艱乎況今緬氣方熾徵兵轉餉之費公私殲竭而又益以額外之徵求其何以堪伏乞明諭戶部令該省止解年例金二千兩如以爲內用不給請俯從撫臣之懇停免舊歲所增一千兩則約已裕民滇氓微再造之福矣臣再惟近日言及于罪逐之臣陛下以爲市恩言及于滇南之金陛下以爲奏濶臣亦豈不知緘默可以自容哉第念職司耳目誼切匡正當此才乏民困之日而坐視端人淹于屏斥窮陬疲于征輸耳目之謂何臣之罪且不容于堯舜之世是以冒昧塵瀆仰回天聽惟願陛下以用沈鯉孟一脈之心盡召逐臣以賑中原之心遠徹遐壤則至仁天壤同流而聖德古今罕並矣

請容直臣以勸百僚疏

頃該吏部以會推閣臣之故上干聖怒嚴旨督責降處司官旋以言者申救斥爲編氓朝論惜之臣言官也誼不能默默無言臣伏惟陛下念閣務繁劇簡任輔臣不卽斷之宸衷而先付之廷推以示公也銓臣

博訪旁搜疏名上請公論採之盈廷可否決于聖斷非敢專也亦非敢私也且威福者朝廷之權也該部亦不得而專也予奪者君上之恩也該部亦不得而市也以今聖明在上清議在下一時臣工非至愚不肖誰敢罔上行私自速罪戾而況郎中顧憲成者砥行好修往以直言獲譴陛下起自謫籍而用之矣司銓未久復遭摈斥士紳相顧咨嗟咸謂憲成以直道見黜而陛下有不容直臣之名將何以勸任事之心鼓豪傑之氣乎夫用舍者國家之大政也銓臣者又用舍人之人也邇來相繼屏去不竟其用孫鑛去矣陳有年杜門求去矣司官之空署削籍而去者至再至三矣今顧憲成又以罪去前者將竭後焉不續人才凋謝可爲寒心語曰察察不可爲庸庸多後福臣恐今而後非如王國光楊巍也者則不能一日爲太宰非如徐一樞謝廷棟劉希孟也者則不能一日爲部臣臧否混并舉錯倒置將使黜陟重典爲權門供愛憎銓衡重地爲私門樹桃李天下不知有是非人心不知有勸懲風靡波流莫究所終矣大抵近年以來君臣道隔上下異心上所謂可而下未必是也下所謂可而上未必是也用舍一憑喜怒黜罰幾于無章公議壅閼繁言滋起臣謂人才消長之機理道廢興之漸正在于此故願陛下虛心而觀也然臣又有言焉會推閣臣非自十九年始也皇祖二十八年廷推六員而張治李本二臣用卽今元輔王錫爵之入閣也亦會推也蓋特簡與廷推祖宗朝並行已久而要之廷推之法尤自古而然也舜舉臯陶湯舉伊尹而必曰選于衆今輔臣趙志臯等不稽古典不惟遠圖罔爲牽引熒惑聖怒卽揭救數語譬之強笑而神不偕來欲以動聽難矣方今疆場交聳公私耗竭而嗷嗷思亂者又十室而九識者抱厝火積薪之憂所

幸公道昭白。仕路清夷。宰輔無私人。朝廷無過舉。可以回氣化而收人心。而今時事至此。可爲長嘆。臣職司獻納。冒昧塵瀆。非爲銓司惜一郎官也。爲國家惜人才也。爲國家惜政體也。亦願廟堂之上。共捐成心。而重爲國體人才惜也。臣不勝惓惓。



疏 摘 臺 西

著 默 尚 吳

本館據經川叢書  
本排印初編各叢  
書僅有此本

西臺摘疏

# 西臺摘疏

明 元垣吳尙默著

## 蜀中情形疏

巡按四川監察御史吳謹題爲奉命按蜀謹據所聞蜀中情形以仰恩軫恤借籌控馭事職濫竽西台一年所矣碌碌班行媿不能勉圖建白以弼主德而匡聖治伏不以職爲不肖於役西蜀夫巡方而按所屬固職之官守耳第按蜀與按各省不同蜀固越在甸服數千里外扼蕃苗而襟夷漢者也按今日之蜀與昔日之蜀又不同今日之蜀固一殘於播再殘於蘭家屠戮而戶溝瘠者也播曾犯順殘之而郡邑其土矣傾民力以藉其土又傾民力以固其土而蜀已殲蘭曾作難驅之而掃清其穴矣傾民力以空其穴又傾民力以衛其穴而蜀又殲蜀旣疲敝矣賦亦庶幾竄息籌蜀者曰獨不得奢寅父子獻俘執馘以結此一局而猶可幸旦夕安枕也何意貴陽失利喪我師而擒撫臣彼旣再逞於窮蹙之後必難忘情於敗亡之恥彼旣跋扈於新集之衆必不能絕念於故居之土朝廷議兵議餉議督兵督餉之臣遂急黔而緩蜀唇齒相隣安危相倚黔之剝膚禍不在近蜀之震隣患不在遠則以計軫恤於蜀而軫恤急以計控馭於蜀而控馭急矣永寧遵義土城一帶必不得旦夕撤兵寧獨不得撤也且當厚其屯聚而嚴其扞禦時其訓練而遠其僨諜第不知兵何兵也更番漢民之老羸莫必其力借戍夷徼之健兒莫必其心以尺五之虛藉克行間之實伍徒靡供億以烏合之孱衆擾獸擾之窮寇何當冲擊則屯兵宜議也兵一日不撤必

不能一日無糧。誰輸征而供辦。此則兵燹凋瘵之遺黎也。自蘭酋發難以來。見征不足。且預征矣。額派不足。且加派矣。三年內已不啻剜肉及心。浚膚及肌。瓶罍俱罄。計無復之。且至寧不有其田地。輕以予人。而不得。又寧不有其家室。輕去鄉而莫顧者。則措餉宣議也。兵不能無糧。卽不能無運糧之夫。誰跋蹠而供役。此則亦兵燹凋瘵之遺黎也。輓輸之勞。跋蹠之苦。至四鍾不足致一鍾。且半奔命殞身於此。而十不得六七返。當事諸臣。於是議舟運。而山川險阻。道理迂迴。舟所不能行者。固多也。又於是議接運。而兵方嚴。督於堵截。或難遠離於信地。運之所接者。亦有限也。則輓運宣議也。逆酋窮蹙以遁。固知勢之不支。滅此朝食。無難獨以此乞兵。彼乞餉。東爲秦廷之泣。西爲魏符之假。勾連族類。以作怒臂之螳。然而孤兔之悲切相關。犬馬之羈勒有術。此輩雖陰爲犄角。弭以朝廷之威靈。則無不斃。雖間有觀望。激以朝廷之明信。則無不轉。是不可不離散其黨。而黨何以離散也。跳梁者一藺。環三面而窺伺者。且數十藺。曰改土爲流。蠶食且及我朝廷。車書一統。幅員萬里。何所藉此林箐。以拓我疆土。獨以逆酋不軌。無所逃於天誅。一日渠魁授首。而各人其土。朝廷又何利焉。所當明白曉諭。以安其反側之心者。也是在開釋其疑。而疑何以開釋也。黨援者罪在不赦。若帖焉效順。如烏蒙川雅等。皆奉正朔。唯謹者也。此不可不用加獎。何也不獎其恭而效順者。不足明。負國者之爲逆也。戮力行間。如邑梅、石耶、平恭石柱、西陽諸土司。皆衝鋒陷陣。立有功次。此不可不按其功次。亟爲敍賞。何也不賞其忠而效力者。不足明。鼠竄者之爲觀望也。是在朝廷下尺一之詔。沛如綸之音。拊緝流離。慰安反側。念此蜀兵蜀餉。杼軸皆空。庚癸頻呼。乞勅計臣。

力爲設處，量行協濟。此亦翳桑之壺餐，而旱魃之涓滴，不則額外之徵，如典舖、稅契、夫馬等項，斷不宜一概科派，復爲削錢之計。再作焚林之樵，又念衝城犧穴，矢石同嘗，燐爛可念。乞勅樞臣查明前按臣敍功一疏，凡土司有功可紀者，量爲加銜加賞，以旌其勞。卽地方士民倡義守城，捐資助餉者，並與甄別，列之賞格，以作其忠義之氣，而鼓其效用之志。此朝廷勞來寬恤之恩，而亦激勵鼓舞之權，所以收蜀之前局而不虞黔之後轍者也。臣凜簡書以按此一方，何以宣其恩而奉行其權哉？察吏而已，何以察吏哉？察吏於安民而已矣。當此瘡痍未起，鴻雁初集，多方體恤屯兵，而不見兵之害；征糧而不見糧之苦；督運而不見運之累；出之湯火之外，濯之清冷之中，所謂仁吏也；廉吏也；循良吏也；亟獎之，弗敢後。當此諸夷連交，窺關號澤，駕扼以法，而不生彼之心；羈縻以恩，而不損我之威。去逆取順，與之休息，所謂能吏也；智吏也。幹濟吏也；亟獎之，弗敢後。不則必不能浮採其赫赫之聲，而漫抑其悶悶之政；必不能毛舉其繭絲之能，而薄收其保障之功。必不能近信其善事上官，巧獵之聲譽，而遠遺其求瘼下民，拊摩之實惠。必不能徇其牆壁之厚，與援之深，而不一諳於閭井之情，匹夫之口。有一於此，則六察之所不載，而職之所溺也。職陞辭往矣，在巡方則言巡方，巡方在蜀則言蜀。惟嚴行申飭，俾得藉天語之宣布，以寧全蜀之宇，以無隕越巡方之職，則愚臣幸甚，川蜀幸甚。

### 博採道將之議疏

巡按四川監察御史吳謹題爲博採道將之議，以守爲攻，以屯爲守，少甦極罷，徐圖善後事。臣之奉命按

蜀也策蜀者曰必殄滅逆商父子馘而俘之以獻明天子蜀之策臣者曰其庶幾扶瘡肉骨澇涸噓枯以俾我殘蜀獲有寧宇也臣於兩者不能置一對及臣入蜀蜀兵之號於臣曰是且枵腹而陣滌釜而需蜀民之號於臣曰是且鬻子而供委骨而輸諸將之爲兵請命者曰何以應庚癸之呼而士飽馬騰以圖大創諸有司之爲民請命者曰何以拯彫瘵之衆而寬徵罷運以獲息肩臣於兩者不能置一畫蓋蜀之兵連四五年矣不啻皮毛俱盡而髓骨皆枯矣法曰鈍兵挫銳屈力殲貨今日蜀兵之謂也又曰國之貧於師者遠輸遠輸則百姓貧今日蜀民之謂也今日之蜀如馬之極疲而策不前者然此須時其飲食息其筋力則可而復驅之走峻坂有立斃耳又如人之病尪羸而初起者然此須飫以梁肉服以參朮則可而復藥石攻之元氣愈索矣猶且曰罪人之未得蜀局之未結夫罪人一日不得則軍興一日不已軍興一日不已則餉運一日不歇嗟此頹尾餘生贊首子遺不轉而溝壑則挺而走險耳此萬不可再得之蜀民者也且亦有窺於逆商之形勢矣逆酋父子隻然一身如孤雛弱鼠誠得而搏之一壯夫之力耳第其所憑者前巖而後箐所倚者左狐而右兔我以千騎萬卒擊之而不足彼以一人竄匿之而有餘我從烏道一綫環攻之而不得彼從千窟百穴奔投之而無不可則此一曾者可以間獲可以購獲可以誘獲而必不可陳兵方駟以獲間獲購獲誘獲者可乘機可觀會可因勢制權而必不可卒得之旦夕歲月間也以民若此以賊若彼奈何驅必不可再困之民追必不可卒得之賊則莫若退而議守守者宿兵也無徵發無遣調無誠於旌旗枹鼓之驚無虞於雞犬麻桑之擾而所寬於民者十之一守者主待客也逸待勞也

其虛冒可覈也。其老弱可汰也。其兵伍可減也。而所寬於民者十之二三。然而形之敵必從之。予之敵必取之。以利動之。以本待之。則未必非坐而制敵之勝算也。永寧一路。秦列之蜀郡。漢收之益部。唐宋以來。稱閬州。非不毛之地。遵義自永安莊直至附郭。皆平洋膏腴數萬頃。此皆不闢而可田。不墾而可耕也。則莫若羣而議屯。嚴督諸將官。數所部若干兵。責種田若干畝。比西成各報收穀若干石。足支月糧若干日。如是。則一年二年可免輓運之苦。而所寬於民者十之四五。三年以後。量徵其稅。以充月餉。而所寬於民者。十之六七。且此沃土之區。曾蟠踞之。以爲生聚。以養成尾大之患。曾據其利。而曾叛我。我據其利。而我制曾矣。曾以在穴蛇鼠旁。睨而扼我曰。食不繼。兵必撤。兵撤而彼乃可尾其後。若我收利於屯。不掣肘於餉。彼窮蹙子。曾能長作空中蛇鼠哉。此諸葛武侯所以北伐。而趙營平所以制西羌也。此我自蘇困之術。而正坐困賊之術。自固其圉之術。而正遠壯其猷之術。一時濟變通窮之術。而正百世永賴永利之術。督臣與臣。臣與道將諸臣。嘔血瀝心。百千擘畫。無以踰此。但一時所需牛種器械之資。約費萬餘金。當及時分給之。不能待。又當專設一道臣。駐永寧。帶管下南遵義兼清軍屯田之銜。調兩府廳一於遵義。一於永寧。而分理之。乃屯政有所責成。而轄制衛所統隸會長亦於焉攸屬。夫牛種之需。督臣與臣。自當設處以給。而立以專官。攝以分理。則在皇上垂念封疆。軫恤彫疲。下部臣而酌議之。非臣所敢專也。此臣區區一念爲蜀請者也。夫寧獨蜀也。今天下力疲於征調。財匱於轉輸。政事縮於補苴。風俗敝於虛耗。在在見不足之形。有奄奄莫能終日之勢矣。及今而挽回之。大約在培命脈。葆元和。而耀威張。武爲緩。在固榮衛。綱

牖戶而遠勤遐暢爲緩。在廣收拾惠安集而興師問罪爲緩。得此意而存之。榆關之於敵。黔之於水西。皆可佐籌一二也。理合具題。伏乞勅下該部從長採酌。將屯種攻守之策。專官分理之制。速爲議覆。則天下之所徼藉休息而底定之者。豈獨西南一隅之蜀也。爲此具本謹題請旨。

蚤勦大舉疏

巡按四川監察御史吳謹題爲撻伐之事任甚重。會勦之機宜已審。懇亟允督臣接濟之請。蚤勦大舉。以奏虜功事。西酋一局。兵連禍結者五年於茲。頃以黔之督臣改而歸蜀。若曰。是固能制逆閭之命。以奠安蜀土者也。以熟於料闖者。料水西諸酋。審於奠蜀者。奠西南一隅。不啻西羌之屬。趙充國而西夏之倚范仲淹者。乃督臣亦毅然自任。凜然卻顧。簡大將偏裨而分授焉。期會三省諸撫臣而八道布置焉。蜀之進兵也。扼諸夷之要害。而三路屯聚焉。故請兵以二十萬。而請餉以百萬。其請兵必以二十萬也。深計逆酋之狐連而兔合。狼奔而豕突。非分攻不足弱其力。非合擊不足蹙其勢。固將爲萬全制勝之術。以圖一逞。而請餉之僅以百萬也。則深慮國事多艱。民生如燬。猶不敢什昔者任事蜀中。兢兢持算計奇羸之苦心。伏讀溫綸下部。卽與措處給發淵哉。聖慮不忘念西南半壁。而爲督臣計。周且決也。乃該部酌覆。又鰥鷗然慮太倉之如洗。而九邊之正餉常告缺焉。夫國儲懸磬。邊餉時置無論。司邦計者抱仰屋之嘆。卽封疆外吏恤緯之私憂過計。不勝如擣也。第以五六年披猖日甚之寇。欲殄而殪之。自督臣以黔之督撫諸臣收拾不來之疆宇。欲底而定之。自督臣此其仔肩何重。而委任何專重責之仔肩。輕畀之事權。專屬以委

任。怪假以便宜。將令督臣何以展布四體。握擒縱之柄。而酌勦撫之機。不乃馳騁驥之足。而故繫之掉孟賈之臂。而故掣之耶。且該部之所以予督臣者。又可疑也。其予之也。以楚未解發之六十萬。又以蜀請留之十九萬。夫楚未解發之餉。果盡以畀督臣。豈不足藉爲調度徵發之資。少佐緩急。乃黔撫臣新任事矣。能悉黔之敵賦以從事。而不一仰給於楚乎。恐彈丸之黔。數年屠痛之黔。勢必不能。則此六十萬者。必不能朝檄楚而夕釐蜀也。蜀之請留各項錢糧。是督臣舊撫蜀時。所乞停起運。以充用兵精餉者也。自軍興以來。允留者五年矣。新撫臣蒞任來。日練兵。日訓士。日繕器械。峙糗糧。振頓爬梳。着着精實。以預儲督臣援黔之需。而蜀事又有不止此者。流賊出沒神宣諸驛。則調兵而北。獮番蹂躪小河水進諸堡。則調兵而東。孰非藉此續命之膏。輕重布而盈縮施之者。則此十九萬者。必不能此沃焦而彼潤涸也。名予之。而實無裨於握算。則何益。督臣無米之炊乎。願該部爲督臣深計之也。該部之意曰。駐兵屯種。爲第一義。夫屯種之舉。臣首言之矣。詞臣。寺臣。餉臣相繼言之矣。卽今黔按臣亦周悉言及之。第此一議也。便於竭蹶輓運之衆。而不便於河上道遙之兵。便於焦勞徵解之有司。而不便於尅扣虛冒之債帥。遍野皆流離荒蕪之產。而曰無土可犁。滿目皆膏腴潤沃之區。而曰無田可耕。揀其老弱占役之伍。莫非于耜舉趾之夫。而曰妨守妨戰。稽其冒領虛扣之糧。莫非銚鏤未奪之資。而曰無牛無種。苟非新推二監軍任怨任勞。不憚胼胝之苦。以全副精神。專注之於此。則屯政終成啖畫餅。而士之飽騰何日。民之息肩何日也。此臣不得不從計臣後。倦復剴切責之者也。伏乞勅下該部。亟議所請百萬之餉。以接濟撻伐之用。而又嚴督二道。

臣力行屯種以甦疲民輓運之苦則西南四省所藉覆宇者無涯量也爲此具本謹題請旨

覈敍平蜀功罪疏

巡按四川監察御史吳謹題爲蜀難既靖蘭穴盡掃謹覈敍文武功罪以示激勸事竊惟逆曾父子之發難也雄據渝城而渝城恢復矣攻圍省會而省會安堵矣屠略四十郡邑而郡邑漸次廓清矣一鼓成淝水之捷三戰復壽陽之境五風依故國之都四隉入新豐之宅舉皇上舊時之土宇完完全全還之皇上斯亦宣暢武功掀揭殊勳已獨以官兵進取忽有江門等處之敗維時狼子之心孔熾螳怒之臂益張糾結水西烏撒諸夷之黨連蛇豕以爲羣鼓煽都都卜昏楊保之舊民聚蚊蚋而成讐東劫西搆左衝右突蓋自建武以至遵義二千餘里無不鹿挺險而豕橫突矣督臣朱燮元與前按臣張論晝夜枕戈嘔心擘畫會議道將分布伍路以爲捍禦長寧建武二路監紀則原任僉事劉可訓知府鄭朝棟同知段師文推官胡平表將領則參遊張邦紘范繼道加銜將官潘映奎王懋官等也納谿一路監紀則原任參政閔夢得副使李仙品將領則參將林兆鼎加銜將官鄧懋官劉養鯤等也仁合一路監紀則原任參政王世仁副使徐如珂將領則將官羅乾象薛來衍譚大孝王元弟馮世修等也桐梓落紅一路監紀則參議趙邦清僉事盧安世將領則副將沈崇極秦衍祚加銜將官侯良柱鄧朝用等也遵義綏陽一路監紀則原任參政吳國仕將領則加銜將官陳一龍趙文進駱麟等也嗣有遷轉新任陸續改委則入永寧者原副使謝渭也入綏陽者則原推官李必達也入梓桐者知州朱毅臣同知商良弼也入仁懷者推官蔣化龍同

知劉鼎新也。新任遵義道，則副使侯國、遵義府知府胡悅安也。賊兵出沒納谿之間，奉新命，建大將軍旗鼓，駐劄納谿者，總兵李維新也。分督五路餉務，飛輓以時，而轉輸不竭，則原任參政陳龍光、吳光義，副使赫奕、僉事錢時，知府劉澤大、余新民，同知翟文簡、王國治，劉國藩，通判梁文輝，推官周嘉誥，知州黃立言、楊汝昇，商之鑑，知縣韓應龍、鄒昌魯、岑昌運，程士昇、張堯揆、趙明戴、周惟軫，耿培等也。集兵一十六萬之衆，轉戰二千餘里之間，廝血一二年之苦，摧鏘數百戰之勞，跋涉峻岐折坂之危，浪吸腥風，彊露之毒，或彼突攻而我禦其鋒，或彼堅陣而我拔其轍，或偶遭重圍，批中堅而直出，或先受敗衄，鼓暮氣以收功，或分布策應，潛搗其後勁，或連營對劄，明扼其前茅，人人舉鵬力以揚威，處處燿犀渠而貿勇，一戰於高縣，賊勢方張，官兵望風爭奔，劉可訓提劍一呼，三軍氣倍，扼險樹柵，列營結陣，而擒斬其奸細百餘輩，焚其營壘三十五門，且分路尾其後，斬首三百一十七名，羅乾象率譚正修、譚正常、覃寅化等大戰，斬功三百三級，而仁懷土城等處，遂以恢復。一戰於落紅口，而盧安世、同沈崇極、秦衍祚、張奏凱、舒洪烈等屢戰屢捷，擒斬六十六顆，燒其營房一百六十餘間。一大戰於長寧，賊兵四面夾攻，山谷俱震，胡平表、鄭朝棟、李泮等連寨結營，囊沙劄水，對陣而擊，劉可訓、范繼道等各盡發援兵合應，既放水衝沒，又併力截殺，當擒其僞將軍李楫，斬級六百四十七顆，生擒五十八名，時賊兵殺戮者滌沒者，逃散者不計其數，賊父子相失，竄埋草間而宵遁，然困獸之鬪益狠，虓虎之征愈猛，又輦金帛借水西阿烏迷馬步兵八九萬，先犯我遵義安羅，而守將侯良柱、陳一龍等潰矣，再犯我落紅口，而將官張奏凱等潰矣，督臣又展轉而計曰：我

兵分五路而路復五六分之馬步多寡之數實不敵也乃屬閔夢得督鄧懋官劉養鯤等列陣納谿以示敵密檄李維新李仙品督同秦翼明等兵俱改繇長寧會兵而進於是張令秦國俸李鴻功劉宗良盧世卿等一戰於麻糖坎再戰於瀘州衛而洗燬其九姓二長官司一帶營寨生擒其僞都司參將等八十五名斬級五十七顆秦翼明秦拱明秦可等戰於青山崖直上第二洞擒其僞丞相并妻妾二人斬級二百一十六顆生擒一百五十九名燒燬其營十七所劉養鯤鄧懋官畢應台等戰於馬克橋而擒其僞將柳元儒次第打破仙人寶月橫山八甲中弔三溪等處燒燬其衙舍營寨斬級六百七十二顆斯時也賊各路守隘之兵盡散聚於土地坎會集水西烏撒諸援兵欲效破釜之計將爲捲土之圖厚出犒賞憑高踞險欲與我兵決一死戰大將塵諸將進莫有應者李仙品劉可訓鄭朝棟厲聲趣之曰有進無退當以身先於是秦翼明兄弟與馬齡郭起柱秦可等願任前驅四鼓發兵天明接陣鏖戰至午斬其僞總兵吳繼周賊遂披靡奢寅亦被創遜去奪其所乘馬併僭僞儀狀斬其級八百一十五顆生擒一百五十八名被傷溺水者無算於是二酋知大勢已去盡焚城中屋廬列兵紅崖山上大小官兵四面追逐走金家山又走獅子山共擒獲有名頭目周邦大徐應龍妖教首劉明選等一百一十三名斬級一千二十八顆城中男婦投出二萬餘人而永城遂定鄭朝棟督王懋官周良材等攻天臺圍夷目羅甫羅于朝父子率兵數千投降獻出曾寄金女冠段疋等物一百一十八件羅乾象譚正脩等陸續攻破白崖楠木樂用青岡等圍又攻破銅鼓等寨斬功二百六十二級招降羅書成舒廷采等苗夷萬餘家而附近永城之夷目俱定

然而孤兔悲切之情徵風召雨。獮獍難馴之性起蟻飛蜂。水西援兵又分兩路而驟至矣。一路出古蘭王世仁、徐如珂督羅乾象、譚正脩等設伏以待。兵至大戰兩晝夜。斬其惡目魯仲賢、軍師羅奇割級四百五顆。跌溺死者無算。而蘭州之九鳳樓化爲煨燼。數代之墳墓掘爲墟土。一路入永寧劄新寨不動。李棲鳳、李維世、李棲凰、李維忠攻而破之。而薛來衍打官斗山、胡汝高畢應台攻木角、豬觜二等。范繼道攻水滌、張奏凱、王正相、張洪烈攻馬湖鬼么。餘如牯牛、酸聚、木姜、馬蝗、發窩、滑石諸囤寨俱相繼俛首聽撫。獨憑崖負險。展轉深入。大將親提兵抵馬鈴河。而愈追愈深。莫窮梟首之誅。時前按臣溫臯謨啣命入境。方下車。卽詣瀘州。與督臣再申軍令。大捐犒餉。以廣勵諸士之氣。鄆家渡之劄。幾爲所綴。而忽值其奸。三路之攻。幾爲所懾。而卒摧其鋒。出瀘州。則張令、張學禮等連戰大捷。而斬其級一百一十顆。出永寧後。則劉養鯤等據險堅守。而賊衆不敢窺左足。出永寧東門。則方虎斬其頭目落馬。總鎮親督大戰。斬其級九百三十顆。而賊遂夜遁以去。蓋自大壩、卜昏諸夷金鉦所過。土靡瓦解。魚驚鳥散。而雞廠、鍋廠、白崖、白撒、菸豆、白旦。對車、小水、長江以內。無不澄氛廓祲。若霜風之捲秋籜矣。之役也。摧九嬰之沴。夷三苗之墟。彎弧四連。五合之衆委亂骸而擠壑。長驅懸車束馬之道。垂建瓴而騰空。元雲結陣。風聲鶴唳皆兵。赤日歛金。匹馬騎輪無返。窮廬聚處之穴。煽爲彌山彌谷之塵。犬羊世守之區。盡爲我疆我理之土。奔獠蠻而解辦。奚翅襄毅斷藤之峽。銘紅崖而勒石。何止伏波銅柱之鄉。驅逐若彼蕩洗若此。斯不足大快殺戮文武之憤。而盡雪攻略城池之恥也哉。獨以父子二酋負命窮山游竄僻澗。罪人未得孽本未翦。以故援枹鼓臥金。

鐵之士三年來盼闕廷而不獲一命之褒乃今逆賓已授首矣屍寸斷而骼一炬刑僇爲最酷戈內操而兵外應設購爲最奇臣以行役將竣之時幸賜插羽之報方誕將天威以獎率三軍前終逆而一局後且誓旅揚麾共急黔難而蚤奏西南耆定之功也尙待何時不爲控鳴於皇上之前哉我皇上鴻猷元暢神略遐宣天助順而人助信百爾有位無不闡揚聖武而廣布之黃閣重臣運斗杓而調元化弼亮在安攘揆奮之外大司馬握重本根之地張皇六師大司農持籌盈縮之總誕修六府兵垣諸臣以睿謗著頗牧之聲職方諸臣以簡閱羅桓赴之英則寵頌自有殊典先督臣方拯焚溺而解渝於厄旋披冠髮而勤黔之急秦楚諸撫臣憂厝火而切同讎之義綱牖戶而修于鄰之震則論賞自有別格皆非臣所敢僭擬也謹據督臣敍述之本末參以臬司會同諸司道覆勘之功次別白而差等陳之總督貴州四川湖廣雲南廣西等處軍務兼理糧餉兵部尙書兼都察院右都御史朱燮元鉅力六鯁負地偉猷八面擎天奠魚鳧於擒攘中再復漢京日月驅氛祲於要荒外丕揚周旅霆雷神紀妙五間之機用奇用正恩信假七縱之術攻力攻心始終拮据者六七年風塵勞於飽歷西南底定者四五省赫濯訖於遠暨功與河山同垂賞應帶礪竝永先任按臣今陞大理寺寺丞張論風猷肅當道之輪霜氣寒尙方之劍單車下倥偬之際一腔忠義告天前箸借折衝之籌滿腹甲兵藏地岳山易貌草木知名前按臣溫皋謨孤騫突兀班心駭厲震寰域外法肅之綱之紀元熊赤豹皆馴才兼維文維武封豕長蛇遠屏三巴法曜半壁甘霖督餉御史丘兆麟含性神羊之特赭姿天馬之騰節擢標格以干尋才委波濤而萬頃經術出其餘緒關中芻輶雲

蒸威稜聾於雄風域外指撝雷動此四臣者在朱燮元自藩司以至今職省會百日之捍禦郡邑五旬之蕩復闕穴三年之犁掃手口卒瘡而血誠不改桑榆在閭而家事不問從來勳績未有如其大勞苦未有如其久者在三按臣先後戎行之間誓師授律焦慮嘔籌謀斷相資兵食互策乘權不同勞則一體然皆皇上憲臣也不敢擅爲之擬鎮守四川總兵官李維新慷慨常懷萬里沉雄妙運三門九地九天驅孫吳於壘壁如風如雨列衛霍於止齊大樹雄圖嫖騎飛將此一臣者猛氣無前神謀不測父子肝膽視死無時故每戰獲俘馘獨多而渠魁就殲疇間尤奇所當特加陞擢仍與恩廕以旌其勞者也監軍右布政使陸偏沅巡撫李仙品丹心貫日干霄偉略動天靜地指顧則氣森風鶴壁畫而旅鞠戛焞師貞丈人顯允元老監軍左布政使今陸偏沅巡撫閔夢得濯志寸丹浴日誓師太白橫天武奮文揆堂正六師長子刑伐德守保釐半壁長城監軍參政今陸右布政使王世仁敏鍊截犀之釣鎮重函牛之鼎掃捲槍於方獵瀘水重清廓氣祲於長驅土崖銷赤參政今陸按察使吳國仕矯操茹苦分甘壯略擢堅陷銳勤一旅於草昧雷雨經綸肅八法於披靡河山鎖鑰副使今陸光祿寺卿徐如珂聞難而星夙單車一腔熱血臨戎而露冷援枹百折忠肝森羅武庫五兵指畫奇門八陣副使今陸參政謝渭胸藏黃石韜鈐箸借金城方略算不遺於竹頭木屑惠常周於挾縷投醪僉事今陸參議劉可訓料敵六奇時出臨危九死如歸提星劍以先登長虹東指擎霜旗以橫入妖焰西驅僉事盧安世壯氣直泥函谷神機潛受圯橋祭征虜之赤衷羽親矢石范老子之閼略胸富甲兵僉事段師文雄圖偉幹足智多謀抗旌蛇豕屠圍之中渾身是膽

橫及羌彝重穴之外。尺土皆勞。僉事胡平表乞師效秦廷之哭。義大復讎。揮戈矢魯陽之精。忠堪返景。令嚴氣肅三軍。膽烈風揚五部。馬湖府知府鄭朝棟抱略文經武緯。臨戎義震仁懷。輶列五部之雲。分麾玉帳。氣掃千山之霧。拓土夷疆。以上十一員皆身親戎行之列。智殫監紀之略。積員顱而成京觀。犧漠庭而成鄉田。皆所三門授之而九變佐之者。至李仙品、劉可訓、盧安世、鄭朝棟四臣。又始終烟瘴之鄉。辛苦戎馬之場。丹誠愈堅。勞勳尤著。而設購左右。剉屍燬骸。以殲此首惡。則獨可訓與大將諸臣。積謀而俛獲之者也。所當破格陞擢。以旌勞臣者也。督餉參政今陞右布政陳龍光持籌縝密。應務焦勞。念切納溝瘠。脅危病而不避。計周活餉。綜水陸以交輸。參政今陞按察使吳光義敏識咄嗟立辦。精心擘畫咸宜。輓運如期。制無假於木牛流馬。徵輸有法。弊尤絕於蠶食繭絲。原任僉事錢時應機朗若然犀。握算恢如遊刃。調劑盈縮。蜚芻輓以雲蒸。軫念兵民。馳山原而星邁。以上三臣者。當物力匱詘之時。供五路軍興之資。日夜勵勤。不遺餘力。關中之轉輸。與垓下之攻伐。緩急共之。而吳光義創舟運以蘇民跋涉之苦。築外城以增蜀金湯之固。尤百世永賴之功。所當與監紀諸臣一體破格優賜擢陞者也。原任副使侯國秉憲夜郎。旌心白日。盡瘁荒徼而不避。克詰戎兵以多功。監軍副使張起鷗明夷之正志。蹇難之匪躬孤忠。九死不回。正氣萬人必往。此二臣者所當併敍。以俟優賚者也。原任左布政使周著品格九霄直上。才猷三峽倒流。登陴力捍危城。功維社稷。行省慮周。軫瘼績茂。屏藩左布政使。今陞太僕寺卿林宰。握幾渝海釣鯨。御變崆峒。倚劍厝站。危於聳固。半壁全撐。籌虛耗於灌輸。寸心欲嘔。左布政使史文煥。植品嶙峋。抱才博大。引憂

於由饑由溺。攸命旬宣。掘計於時。盈時謹。允當會計。左布政使今陞河南左布政使詹爾達。明鏡疏觀。域外靈珠妙運。環中拯水火於溺焚。瘡痍立起。疏錢穀於泉布。庚癸潛消。右參政今加陞二級戴燝。捍危城於方搶。洪濤孤艇。畫定計於孔棘。墮坂鹽車。翊世長才。干城重望。原任按察司今陞浙江右布政李守俊。器局恬夷。風猷縝密。稟六條以勅法。百度維貞。嚴三尺以明刑。萬邦作憲。原任松潘道參政今陞廣西按察使婁九德。節控氐羌。百二形遙犄角。煙消風洞。三巴勢壯金城。鎖鑰維嚴。藩籬孔固。原任提學道參議今陞山西副使來復。東壁文星。驅屈宋楊馬以載筆。當陽武庫。綜兵農禮樂而森羅。式士斗山濟時舟楫。兵巡下南道副使許士奇。抵掌兵機。泉倒峽而風生壑。借籌方略。弦落雁而刀解牛。志任希文。才頑吉甫。原分守川北道參議翁登彥。法大廉小。果州之雨露維新。簡卒蒐乘。邊郡之風霜時肅。胸藏萬斛才裕。九邊以上十員。雖未歷軍前。而司總糧儲之寄。則緩急相佐。彈壓邊疆之重。則安危相倚。若來復以學臣搜助。糜金五千餘兩。真一意急公。不遺餘力者。許士奇近以巡道兼督兩路餉務。事事焦勞。籌民籌兵。酌解酌收。各有成畫。所皆當酬以不次。特示激勸者也。經理收支餉銀。重慶府知府今陞副使已故余新民。截鐵斬釘之才。茹荼滾藥之守。急省難於矢石。不恤捐軀。拯渝民於沸湯。不辭濡首。敍州府知府今陞副使劉澤大。迅才濤瀉湍瀾。亮節冰寒霜月。艱危時不難鞠躬盡瘁。節省處尤見約已裕民。原任瀘州知州王新民。壯氣凌雲。雄才掣電。効危城於風靡。任勞亦任怨。徵罷餉於雲集。多譽亦多誹。此三臣者。或當土司親伺之衝。或當滿城灰燼之餘。餉米之收支。援兵之出入。日夜經理。迄有成績。在余新民所當優恤。劉澤

大所當優轉。王新民亦量錄才以酬其勞者也。分理監紀、重慶府推官。今陞僉事。李必達整間止水停泓。精密冶金煅鍊。讞獄仁流三綱。督戎威振六師。夔州府推官蔣化龍。摘發洞于觀火。操持瑩若飲冰。掀揭長才。艱難正志。遵義府同知管仁懷縣事。商良弼艱貞履險如夷。撫綏嘘枯爲潤。張弛中節。夷漢傾心。已故同知冉峯挺身危撼之時。盡瘁窮荒之邑。天涯歸骨。異域孤忠。涪州知州朱毅臣。勁節干霄。壯心指日。賈勇祖鞭先著。長驅孽黨俱靡。分委督餉。遵義府知府胡悅安。心思縝密。才識老成。徵發凋疲不擾。散支士伍無譁。敍州府同知翟文簡。千里烟樹。瘴雨兩年梯輓航輸。殫力勤渠。精心經畫。重慶府同知今陞南京兵部職方司員外劉國藩。貞心茹蘖飲冰。應手批虛導竅。拮据獨勤。騰飽歸功。敍州府安邊同知今丁憂王國治。經理有條。榰撐獨力。飛輓民無瘡馬。比干兵若投醪。成都府陞任通判梁文輝。赤心願效封疆。殫力甘勤梯航。民鮮劬勞。士消庚癸。馬湖府陞任推官周嘉誥。祥刑仁頌騶虞。綜算智稱計相。綏懷心切。保障功高。遵義府推官陳達道。雍獮盡殲逆黨。招徠再復殘疆。儉歲嘉禾。疾風勁草。達州知州。今陞遵義府同知黃立言。緝守練才。淵衷挺質。清剔如羊如粟。輸將如坻如京。真安州知州楊汝昇。才揮霜刃。守湛冰壺。固圉計切綢繆。足食恩淪醪續。蓬州知州商之祚。雅志勤公。練才集事。跋涉不辭勞瘁。收支獨號公平。西充縣知縣程士升。直誠天日可矢。執法山岳不移。心自任勞。事無避怨。運同管南用縣事韓應龍。鎮定危疆。復固廉明。衆志允孚。功在斬妖。心勞運餉。永州縣知縣。今陞重慶府同知張堯揆。理邑真如理家。足兵又兼足食。才與誠兩公以廉生。綦江縣知縣鄒昌魯。喚咻惠藹郊原。明作威行城社。劇煩就理。盤錯。

見奇安岳縣知縣趙民戴大義國爾忘家湛澤民如保赤謀優借筋績茂提兵長寧縣知縣耿培善政和  
民真心歷險擘畫兵民兩利調劑盈縮惟平高縣知縣傅穎孫招徠鴻雁漸歸勸相耜未成作恩威兩用  
夷漢同傾筠連縣知縣岑昌運心兢集木才練駕輕焦勞罔愛髮膚幹濟咸周巨細梁山縣知縣今陞雲  
南陸涼州知州周維軫丹赤抒誠勤渠集事軫恤小民戴德勞來諸士啓恩敍州府儒學訓導饒迪兩攝  
殘疆一腔幹略披荆棘以闢土拯焚溺以憂民以上諸臣皆親歷艱險之中備盡拮据之苦而黃立言陳  
達道尤始終賢勞擔當獨力籌畫殫精所均宜優擢以旌其勞者也通省同事效勞官員夔州府知府史  
贊舜濯品瑤林瓊樹揮才歐劍郢斤同室纓冠未雨桑土順慶府知府今陞貴州副使楊鳳剿割亂繩就  
理拊循賴尾時甦疴癢念關綢繆策應原任保寧府署印通判許宏綸佐郡譽蜚星駕保釐價重虔刀緩  
急有裨張弛各當潼川州知州姚繼崇素節四知夜凜通才萬應旁周剜肉慮深投醪計蚤查理餉務保  
寧府推官錢允鯨折獄騁虞有頌發奸狐鼠無憑品是珪璋才同干莫成都府推官李曰輔執法三章霜  
肅盟心五夜天知丹筆流膠爰書束伍敍州府推官詹先志節嚴一介才裕四周吳鈞城社無濡秦鏡鏑  
銖必析督發調兵萬縣知縣毛羽健駿品凌空獨鶴鴻才貫斗雙龍桓赳惟威輕軒咸信督夫押運榮縣  
知縣蔣守洵才鍊且勤德威克愛趨事時親瘴癥急公不憚馳驅南溪縣知縣王之朝振釐百廢具興洒  
灌一塵不染戴星雙鳧挾續三軍桐梓縣知縣陳揚美百事起弊維衰四野扶傷肉瘠盤根別利走隘徵  
奇原任知州今改合江縣知縣劉應宸集蓼兵燹茹辛荼蘖拔薤法行強梗烹鮮惠洽流離以上十二員

或督發兵衆而行伍無譁。或督運餉米而轉輸不絕。事事效勞。協濟軍前。相應紀律。以需優轉者也。掌印行都司陞廣西參將。留用軍前。今陞副總兵林兆鼎。大樹驃騎之號。征南鎮北之勳。直破獮狔關。突騎賀蘭山缺。長驅大方域。指戈南漠。庭空原任參將。今陞松潘副總兵秦翼明。氣壓鐵石。膽壯風雲。碧羽霜棲。一丸泥藏封函谷。白招星掃十乘戎橫杜大行。遊擊侯良柱。天馬騰姿。渭熊噴略。手揮魯陽日。妖祲慧掃。頭觸北周山。犧獍狼奔。建武遊擊羅乾象。日磾入漢。微子奔周。用夏變夷。義膽風霆助氣。忘家殉國。剛腸金石鏽精。僉書鄧懋官。七豹傳家。八門授略。坐金城而勒陣。兵氣橫天。當月暈以屯營。羶氛捲電。守備劉養鯤。令嚴五部。計出六奇。乘利制權。畫妙天星。關格揮兵。指及篋藏。黃石神符。原任都司僉書薛來衍。神駒將種。列宿星精。犒享椎雁門之牛。千金死士。分布設常山之蛇。八陣生門。遊擊范繼道。精兵若獸。利器如霜。五間元機。剖兵符於曲逆。多方詭道。殪西楚於烏江。參將陳一龍。負六郡材。學萬人敵。長劍倚天外。驅霍李以列行。元符出橐中。取鯨鯢而釁鼓。遊擊秦拱。明年少終軍。繫纓欲長南越。氣雄杜預。著鞭恐後祖。生斬馘功多。搴旗績著。參將張令。前茅識險阻之形。中權辨虛實之勢。反逆歸順。大義日月。常明陷陣。擢鋒勁氣。河山爲震。參將秦衍祚。兩臂白猿劍術。一腔黃石兵書。繅馬石頭城。披氣黃漠。洗兵天斬水。勒脩魁梧標格。慷慨雄圖。偶雲師以列兵。霆雷八陣。馭風伯而指劍。卓木皆兵。以上十四員。皆始終行陣。小大百餘戰。擒斬四十餘萬。屢挫而卒獲勝。九死而乃得生。鄧懋官潰於納谿。旋捷於江門。薛來衍潰於仁。

懷。旋捷於小峯壙。范繼道潰於長寧。旋捷於馬湖。鬼么及崖下之役。皆裹瘡拼死。血戰殺賊。二三年來。鋒鏑之苦。戎馬之勞。俘馘開拓之功。種種開載在冊。而秦翼明、羅乾象、侯良柱、劉養鯤、譚正修、譚正通。血戰獨力。斬功尤多。迄今設間用。購殲逆賓於帳下。之手。則范繼道實與謀焉。所均當敍別功次。查照條例。破格優擢。以示激勵者也。都司掌印參將周官。譚兵奇正當機。肅伍寬嚴得體。孫吳偉略。桓趙雄名。標下練兵參將。管副總兵事魯美中。緩帶輕裘雅度。射雕縛虎雄風。一面堪當三軍可寄。中軍旗鼓守備李必茂。識諸韜鈴。才長簡鍊。轅門雅著勤勞。分閫更聞偉略。以上三臣。或分轄司閫。或從事行間。各有懋績。均應查照條例。量加陞賚者也。總鎮標下都司劉宗良。丰神秀拔。才略沉雄。彎弓技捷。青萍掃穴。汗流赤水。都司僉書鄒蔚然。猛氣戈揮返日。沉謀陣結連雲。才號驃騎。名高韓白。僉書范祖文。借箸六奇。愈出提戈百戰。自雄氣可食牛。名塲飛虎。遊擊潘映奎。驍雄器宇。沉毅謀猷。橫戈氣壯。兜鍪擐甲。威生介胄。僉書胡汝高。英標健翮。摩空雄略。神駒出水。勇能冒險。功著撫夷。僉書胡肇虞。肅隊令嚴。細柳臨戎。膽落虜姿。憤切家讎。義酬國恥。守備李棲鳳。猿臂挽強龍韜制。變歷塊神。駒有種出。硎寶劍無雙。守備孔全斌。勁氣能擢山岳。壯猷直捲風霜。威生八面。恩洽三軍。守備袁可成。熊姿矯健。豹略深沉。馭卒甘苦與同。臨敵正奇竝用。守備姚化民。睥睨氣吐成虹。叱咤威生震岳。風揚闢外。令肅師中。守備李忠。拔山膂力。聚米韜鈐。沸沙振鼓。飛雲伏石。彎弓沒羽。守備周良。材料敵八風。占氣詰戎。六甲潛機。制變長才。干城夙望。守備李國選。止齊令肅。攻守謀長。分甘醪續流恩。起舞貔貅。

生色。生員加銜守備汪長源棄儒南越縹長。擊楫中流志壯。盾磨露布劍爍星文。指揮守備曾遐中。胸暢兵機。家儲將略。躍馬千夫辟易。鞠師八面縱橫。守備譚大孝。家傳將種。天授雄圖。一門列隊貔貅。百戰摧鋒。旂旒守備武聲華。橫海將軍長風駿馬。彈鋏鋒驅電燄。紆籌法轉天門。守備楊元。插羽徵兵若雨。函犀布陣如雲。七步止齊。三軍用命。守備魯希聖。技能貫虱。志欲屠龍。白馬金羈。俠少犀渠玉劍。良家守備張洪烈。挺生武曲材官。躍出祁連飛將旗。梟克汗縷繫單于。遊擊盧世卿。譚兵六甲神機。制勝八門陣氣。桓桓將略。矯矯虎臣。守備趙瓊。偉標虎視。英略駒馳。用奇動出靜藏。臨敵前茅後勁。加銜參將張奏凱。才猷颶發。丰骨霜稜。驍雄績著。渝城豹略功收。蘭穴加銜守備金文科。飛虎雄沉。阜鵠精悍。草檄風生油幕。提戈電掃蠻烟。加銜守備蘇迪。才猷敏練。智略沉雄。父讎誓不共天。國難甘從裏革。守備吳攀龍。驍雄一劍無前。叱咤千人自廢。威揚閫外。令肅師中。守備王國臣。振旅八門奇正。譚兵四種權謀。偉略凌胡。雄心闕虎。以上二十九員。或衝擊攻殺。各獲有功級。或傳宣布置。效力於馳驅。內盧世卿有象嶺之潰。譚大孝有江門之失。張奏凱有落紅之敗。皆經督臣細打重治。令其戴罪立功。皆報有斬獲。足以掩罪。所均當查明功次。優擬陞補。以示酬勸者也。領兵參遊守備併督陣指揮等官雷鳴春等。共計九十五員。皆對壘衝陣。轉戰必死之場。追奔逐北。深入不毛之地。捐軀殉難。其矢報效。生俘死馘。各獲功次。所均當陞擢。以示鼓舞者也。領哨加銜參遊守把千百總等官周繼先等。共計三百二十九員。攻擊則戈戟相憂。追逐則旗幟爭奔。雖功人功狗。戮力不一。急公殉國。矢志則同。所均應查功分別議陞議賚者也。軍前報效原任荊州

府通判張士彥等共計四十六員名或效卜式之輸邊捐金墾土或效酈生之下齊招叛納降皆急一方之難與效半臂之勞所均應照例陞職或超選或超貢以爲任事之勸者也又查得原任綏陽縣知縣任龍戰功屢著江津縣知縣周禮嘉殺賊獨多岳池縣知縣段可賢除奸守境漢州知州萬砥轉輸效力此四臣者已經論劾去已經劣轉去矣然而前勞不可泯所應照原官仍行器使者也軍前分理餉官成都縣主簿何惟正等共計三十員雖以佐領小官而督押時勤於奔走戴星不苦於險阻輸輓無虞製造有方所應并敍以候陞資者也石柱宣慰司總兵官秦良玉慷慨援兵萬里聲著東關指麾驅賊三巴功高西土鎮雄府知府隴應祥貞志不逐波靡介節益堅塞難夷疆向化逆黨折謀烏蒙府知府陸新調停夷漢之間羈縻文法之外忠貞素著震撼益堅龍安府土通判加銜知府李泮報國忠肝可剖除寇義膽常懸勞勳居多馳驅獨久土通判加銜同知王鼎少年壯俠偉略豪雄馬馳金絡浮雲戈擊綠沉明月真安州土州判駱麟臨難聞雞起舞矢忠擊楫中流功著抒圍才長勦賊忠路宣撫司應襲覃懋勳負力千夫自廢彎弓七札可穿種是將門部非夷落內秦良玉援省復渝之功已經題敍惟駐兵納谿忽以病歸議者頗疑其退避而部將秦可郭起柱等馳驅用命斬獲多功良玉實訓率之李泮首赴成都之援駱麟力保新疆之土覃懋勳鼓先蘭州之捷皆土司中仗義以圖報効者所均應破格酬勸者也土同知陳治安土州判鄭延泰土舍人冉達龍冉紹文夏得閔安文元悅先民王立極以上八員屢經調發各効戰功亦相應照例厚賚者也降將王繼宗等共計二十七名昔爲桀犬吠堯今作楚兵歸漢旣明順逆禍福之機

消其反側。又識險阻箐洞之勢。藉爲前茅。已經督臣加銜委用。應俟其建有勞績。照例實授。以廣招徠者也。死事各官原任松潘道副使李忠臣。閻門摠賊人之鋒。報國齋忠臣之志。異域孤魂。賊營厲鬼。遵義道僉事趙邦清氣節天日爲昭。號令風霆共迅。巖疆盡瘁。烈骨含香。副使加陞一級赫奕。轉輸苦歷瘴鄉。勞瘁溢先朝露。匪躬塞塞。正氣稜稜。以上三員。李忠臣謀賊不遂而死。趙邦清恢復有功而死。赫奕輸運中殲而死。皆委身殉國。置成敗利鈍於弗顧者。所當照例從優議卹。以旌忠勤者也。死事各將士。有鼓奮臨戎。捐軀鋒鏑之下者。如加銜守備潘一麟、劉兆斗、孔之譚。遵義道中軍蘇民心。富順縣縣丞姚一煒。蜀府奉祠張大任。貢生周宸。生員朱國賓、聶天品。義民瞿繼龍、楊佐、徐芳桂、徐教二、傅文玉、李榮、王友。惠朝。又永寧倡義。與副使李忠臣同時遇難。生員胡稱寧、沈芹、劉佐聖、江映星。指揮邱道隆。千戶陳大策。義民杜林徵、何枝等。河邊之燐骨常腥。劍下之壯心未滅。有周旋險難。殞命勞瘁之中者。如原任參將張邦紘。茂州衛指揮曹守爵。守備張明遠。降將宋武。胡汝寧等。百戰之苦功未酬。九塞之幽魂常鬱。所當一併查照。優恤者也。敍州府同知管合江縣事劉鼎新等。共計三十六員。或以押運染病瘡痏。或以臨陣擗鋒矢石。魂歸泉壤。勞在疆場。所亦應分別議卹者也。至於各衙門吏承書辦奔馳齋奏。經營兵馬錢糧。趨事急公。微勞足紀。例得茲列。以希曠蕩之恩。大抵諸臣功次。督臣日從行間。而方略授之。律令齊之。日從諸監紀將領之札報。而彙記之。又從前後之利鈍。甲乙之勝負。而較按之。又從敵之大小。獲之多寡。與當陣之先登後陷。而參論之。又從行列擊刺。睨其膽力。而堅之脆之。覩其謀略。而沉之淺之。則前者敍功一疏。最詳。

備最明核矣臣以事外之身覈事內之功以三年以後之役覈三年以前之事非督臣之敍述孰從敍述非督臣之銓次孰從銓次哉敍述之實情形卽爲銓次之實功蹟故敍述所不載莫敢贅也以其功按之於事以其事按之於人自諸臣之發縱轉運以至尉幕一手一足之力莫敢刪也自諸將之執訊獲醜以至旗較一級一騎之捷莫敢刪也自我師之敵愾賈壯以至士夷之用命降將之倒戈莫敢刪也自壯士之稱捷奏凱以至營中之殞星草野之戰骨莫敢刪也誠見兩年中臥鐫滾鐵坐漏船伏燒屋之勞三年來淹師夷鄉瘴地時時駭鹿譚虎之苦有功不賞而且有劣遷以去者矣望賞不得而且有齋志以沒者矣語曰賞不踰時欲民速得爲善之利也今賞之踰者三年矣且督臣受命總師肆省所爲大將偏裨任之者卽今之戮力諸材官也凡人死愛死義死利非橫開恩數以優之何以酬前勞以鼓勵其後效哉今諸官軍功次文冊具在或應敍或應削分而類之總而彙之皆臣與按察司三覆勘覈之者伏乞勅下吏兵二部再加覆覈查照成例分別擢賚以激勸其忠勤至於奢賓之戮屍燬骸督臣深謀密慮先授諸將以意撫臣尹同皋嚴明振飭再作三軍之氣漸剪其羽翼浸鋤其腹心遠破連約建夷之謀近結部落左右之心陰間密購內應外協以殲此滔天之殊逆則策應布置諸臣之奇功自不可混然而未奉明旨非臣之所敢擅議也緣係蜀難旣靖蘭穴盡掃謹覈敍文武功罪以示激勸事理未敢擅便爲此具本專差承差袁傑齋捧謹題請旨

重地需人疏

巡按四川監察御史臣吳謹題爲督臣聞報丁艱重地料理需人謹據實報聞懇乞聖明勅部酌議題覆以奠封疆事本年五月十七日准總督貴州四川湖廣雲南廣西等處軍務兼理糧餉兵部尙書兼都察院右都御史朱燮元手本爲丁憂事本部院以親老身病具疏乞休杜門候旨間偶於本月初九日接得家報有父封兵部侍郎璘於三月十三日在家病故本部院係嫡男例應回籍守制除具奏外合用手本煩爲查例代題等因到臣隨作而嘆曰西南搶攘六年於茲蜀寇雖殲黔難未夷督臣受命以來方囑心籌畫極力振飭計滅此而後朝食而忽以丁艱去則爲地方憂督臣數年焦勞固省會復渝城搗巢殲逆庶幾戮力封疆以報皇上而卒不免抱人子終天之慟則爲督臣憂展轉思之幸而有撫臣尹同舉在也則上猶可拮据西南一局而下亦可私恤督臣之苦念請得而明言之蜀之援黔也必先養蜀之力而後可以佐黔之急亦必先審蜀之權而後可以規黔之用僻爾一蜀方出之焚灼墮溺之中瘡痍初起呻吟未息皮骨纔換毛羽未齊而於撫臣之外增督臣焉於調發本省之外增四省調發焉總此焦然鞅掌之有司也總此蠭然頽尾之百姓也總此騷然如織之輪蹄也旣奉令於撫臣又奉令於督臣得無一身也而東西應與其所簡閱而大將之偏俾之者共此材官子也其所訓練而分布調之者共此尺伍籍也其所峙之糗糧供歲月給者共此藩司歲賦也撫臣檄行焉督臣又檄行焉得無一事也而左右盡與增一督臣蜀已不勝多事督臣去又更置一督臣焉新舊之交代先後之更張又有市異意而築異謀者得無一大機宜也而始末前後操與此臣謂督臣之不必更設也卽以今撫臣加銜而專委之慮無不愉快

而勝其任者。臣與撫臣共事者十閱月矣。每一見其三五申而令甲布。無不灑然心折。以爲此今時有用之才。亦有數之才也。一下車而綜吏治。詰兵戎。覈正供。清舊逋。事事振頓。無不技經剔而根抵拔。而又爲之酌輕重之宜。權緩急之施。一時民情吏弊。痿痺者起。豪猾者匿。窟穴徑竇者芟。無不人人肺腸滌而肝膽濯。兢飭在職業之中。意寬然而常有餘威。信在控扼之外。精神砉然而無不到。如用剿用撫。用攻用守。用屯之宜。無不與督臣熟籌之有成畫矣。使之得終其事任。猶之以督臣代替督臣也。如卒乘之蒐。器械之繕。餉糧之需。已就撫臣之職。劈畫綜理。一一就緒矣。使之兼總其成。猶之以撫臣終撫臣也。於民無奔命竭蹶之苦。而於事有總挈兼攝之便。於前無更弦易轍之擾。而於後有駕熟遊餘之效。竊謂策蜀以策黔。似無容再計者。轉而思之。獨以滇撫臣不便於相轄。乃滇撫臣之撫滇者久矣。恢復之績。驅除之勞。不曾關滇南而再造之者。是當特賜召還。以爲勞臣任士勸。則別爲推用。似無不可。滇與黔與蜀同事而一體。增蜀督臣以留滇撫臣。固不若易滇撫臣以減蜀督臣之爲地方長利便計也。總之爲滇爲蜀。皆爲黔也。若督臣以其身始終蜀難。而蜀藉以安戢底定焉。已盡殫其憂國奉公一念。而卒鬱鬱人子烏鳥之私。欲撫棺一慟而不得。此於力愈竭。而於情愈苦也。或就近交代。俾得蚤卸其事任。抑亦國家恤勞臣之私所應爾也。臣行役蜀中。幾兩年矣。極知蜀之不必更設一總督。臣與撫臣共事。幾一年矣。極知撫臣之可以兼領此總督。故敢因督臣丁艱之報。陳其繆見。以聽廷議之採擇。而非臣之所敢必也。伏乞聖明俞允。下部酌議。題覆施行爲此。具本謹題請旨。

定賊臣罪案疏

山東道御史吳奏爲賊臣之身已去，賊臣之惡未暴。謹據一時國政以定賊臣罪案事。嘗聞孔子爲魯司寇七日而少正卯誅。此唯仁人能好人能惡人之大公也。我皇上沖聖御極，魁柄在握，勤政勤學，加與維新。未兩月而首允樞臣崔呈秀之去，與魯司寇兩觀之誅何異。今詞臣倪元璽、黃道周首發其奸，而速其去，亦庶幾古埋輪破柱遺風焉。呈秀鬻身奧援之門，入賓閣寺之幕，燬竈者每假大柄以作威作福。呈秀假其所假，而覆爲傳翼。覆爲張吻，樹叢者猶盜大柄以攘功攘名。呈秀盜其所盜，而且以市私，且以飽壑。凡負罪譴而獲免者，未有不夤緣于呈秀而免者也。凡覬顯擢而詭得者，未有不夤緣於呈秀而得者也。黃金白鏹未厭，而羅異珍以進。明珠寶玉未厭，而市麗姬以獻。橫開奔競之徑，廣鑿苞苴之資。陰修恩怨之私，明快仇讐之隙，顛倒任意，翻覆在手。聞有以計謀而罷斥者矣，未有以銓司之推擢而輒行罷斥。而以推擢罷斥者，不知幾十人也。聞有以彈劾而罷斥者矣，未有以卿貳僉同之會推而輒行罷斥。而以會推罷斥者，不知幾十人也。卽職衙門或有差回考察，而以不職議罰者矣，未有以循次題差而輒行罷斥。而以題差罷斥者，不知幾十人也。一人不顧笑罵，侈稱功頌德之章，而吠影吠聲，人習爲固然，恬不爲怪。而天下幾不知有名節，流揭一入家籍沒而身齋粉，人人重足而立，側目而視。而天下幾不知有身家之樂，將作何事，乃與奪情。又恐人之口實之也。部臣李養德、寺臣陳殷、邊臣朱童蒙相繼以奪情留而天祐。而天下幾不知有名節，立馬之鳴屢折，朝陽之音罕聞。一時臺諫結舌，忠正絶口，人習爲容容，以苟免于禍。而天下幾不知有廉恥，立馬之鳴屢折，朝陽之音罕聞。一時臺諫結舌，忠正絶口，人習爲容容，以苟免于禍。而天下幾不知有名節，流揭一入家籍沒而身齋粉，人人重足而立，側目而視。而天下幾不知有身家之樂，將作何事，乃與奪情。

下幾不知有倫常職衙門法紀之司也從未有一院而四憲臣者而有之自呈秀始左都獨坐之位也從未有獨坐而兩設座者而有之自呈秀始而天下幾不知有名位之秩又其甚者先帝不豫中外徧徨猶且嘵嘵爭論功次爲飾治之舉且憑凡一諭易簒且及明知不親政務不問黜陟乃連章累牘班爵賞而列封廕而羣臣謝恩之日卽先帝賓天之日而天下幾不知有改革之大故職論至此而賊臣罪案可定職以此定賊臣之罪案而廠臣魏忠賢之功案亦可覆聞列爵惟五而三據之茅土侈于一時此尸祝而彼俎豆廟食遍于天下臣從賊臣以問廠臣能無覲顏愧心否賊臣去矣且微朝廷優禮大臣之意馳驛以去職恐罪狀未列顯戮未加無以服諸臣橫被削奪之心而杜諸臣橫遭追沒之口也故不避鼎鑊再附兩詞臣之末以上塵天聽惟皇上少垂察焉天下國家幸甚職愚幸甚

因時政之弊以佐新治之隆疏

山東道監察御史吳奏爲摧折極一時之鬱極鬱當闢爵賞極一時之濫極濫當節謹因時政之弊以佐新治之隆事我皇上首黜崔呈秀之佞次誅魏忠賢之奸爲新政第一快典無論百爾有位咸有安位行志之慶通國人心無不途歌而巷舞黃童嬉而白叟遊若至今日而始有生人之樂至今日而始知天地之寬也第自二奸竊寵靈以籠致天下而喜其擁戴己者因怒其不俱擁戴者遂不難以驅除之術爲要結之術於是懸門戶之目尋端捕影索根披株任意而擯之削之追奪之有以銓補而輒報罷者矣彼皆兢兢奉官循職之良也有以會推而輒報罷者矣彼皆委然三孤九列之望也有以典試散館而輒報罷

者矣。彼皆翹然人倫之式、品藻之彥也。有以題差請告而相繼報罷者矣。彼皆急靡鹽而勤王事之勞人任士也。若者何以芟而薙之。不遺餘力。彼固矯矯自持。而不肯爲轅下駒也。彼固子子獨立。而不甘作五鹿客也。是皆一時端方流品也。方今班行落落。詞林若晨星。而臺諫半空署矣。是宜勅吏部札具年來罷斥諸臣姓名。進之御前。并明開以何故罷去。更察其居官無別罪狀。乞立賜召用。以填曠職。而補急缺。此亦佐新政一端也。自二奸擁籞蔭以傾動一世。而暱其擁戴己者。又惟恐其不終爲擁戴者。遂不難以啖人之謀。爲蓋己之謀。於是橫開賞功之典。厭衆欲而塞衆口。軍功屢有敍。殿功屢有敍。而躐級冒銜者。不可勝數。公孤異數也。一時而加級圍玉者。二十餘人。尙書專秩也。一部而並銜者。或四人。或五人。六科化爲節鉞之府。十三道易爲閻寺之堂。工部四司。半爲內外監寺雜處之林。而纍纍若若。如牢如石者。又無足論。濫名器。褻官常。開僭踰之門。裂祖宗之制。至今日而極。大哉皇言。亟停止添註一格。意深遠也。今位次已定。員數且多。未易議改議鐫似宜嚴勅吏部。自今以後。非積資積俸勿得遷。非實功實勞勿得推。非實缺勿得補。凜持後來之拾級。庶漸消前此之積薪。是又佐新政一端也。擢折宜擢矣。而禮臣李思誠爲擢折之尤。秩宗重臣也。思誠又所爲惟寅惟清惟直之元老也。三千之阿堵。明爲皇秀暮夜之金。賞功之太醫。明爲呈秀入幕之賓。止以思誠平日執禮不阿。遂移謾中之追贓褫職以去。辱大臣而憤衆論。莫此爲甚。所當立爲昭雪。召還原職者也。冒濫當裁矣。坐堂卿于郎司之署。擁鶴鳩于諫議之垣。則冒濫而兼以淆亂。今司郎之尙書。已以守制去。而工科之尙書。猶然就列也。在科則不成科臣。在部則不成部臣也。

試問其以訛佞何人而躡得此而覩焉諸科臣之上能無愧心所當聽其自裁以明位分者也。賢才爲國之積名器爲國之維用敢因時政之極弊爲新政裨助一二而尤不能默默于此者二奸仇傾直諫羅織善類杖下漬萇宏之血獄底埋豐城之劍一時清流白馬之禍慘天地而泣鬼神今二奸之罪惡已暴矣試何以慰忠魂而洗冤骨則立沛一時之詔以雪千古之恨臣不能不叩闢三請焉臣愚不識忌諱無任陷越待命之至

### 起廢籍諸臣疏

山東道監察御史吳奏爲廢籍諸臣甄錄有漸論劾諸臣本末宜明謹略爲剖白以仰祈聖鑒事竊照起廢一案議滋聚訟經半載迄無成論蓋數年罷斥幾至空籍欲就所斥概錄之難分別錄之又難也于今一時薦舉又幾滿公車欲就所薦徑起之難分別起之又難也該部因彙三四年來會推陞轉題差被斥者先具疏上請又續查考滿典試條議請告薦揚諸項列名復其官誥以候填補庶幾導滯逆鬱爲國憐才苦心乃曾經彈劾別項尙在查明候題夫諸臣以陞除等項被譴者十之二三以彈劾被譴者十之六七錄其二三遺其六七不乃挂漏多而隅泣益衆乎安得無說而處於此從來言者彈劾人不少諸臣遭彈劾者亦不少大臣偶被人言則引身而退以需論定小臣身攬物論則下部覆議以酌處分未有偶挂彈章便一筆勾抹其生平擯之削之竟同永錮者也就事論事則覈其事而止就人論人則及其人而止未有一疏而臚列若干人蔓引若干人盡從擯削一概抹殺其生平者也逆璫憤怒諸臣之意不盡削其

籍不快。每巧借題目以爲下石。逆璫甘心諸臣之意。不盡空其類不快。每博招言者。以爲假手。于是有投璫而無從者。彈一二人焉以爲容。朝疏上而夕嚴譴下矣。如曹欽程一疏而論李應昇等是也。有忤璫而莫釋者。彈一二人焉以爲解。夕疏上而朝嚴譴下矣。如倪文煥一疏而論夏之令等是也。知其彈劾人之因。則知其彈劾人之品。如是而所劾人爲門戶。爲邪黨者。繫邪乎。媚邪乎。破門戶乎。倚門戶乎。知其彈劾人之人。則知其所彈劾之人。如是而所遭彈劾爲門戶。爲邪黨者。孰邪孰正乎。孰爲門戶中人。非門戶中人乎。皇上試取前後章疏。始終行跡。合觀而參論之。昔日能爲排忠擠良之疏。卽後日能爲稱功頌德之疏者也。昔日甘爲逆璫擯門戶。斥邪黨之人。卽今日甘爲逆璫作乾兒義孫之人也。今日稱之頌之者。未可爲功德之口碑。則昔日斥之擯之者。可爲公忠之錮案乎。五虎十兒四十孫。一切逆璫私人。未可一日置於位。則爲私人妄加擠排者。可容一日沉淪于野乎。諸臣當先觸其兇鋒。故遭其竄逐獨旱。諸臣顯忤其意指。故展轉而驅除之必力。則夫以內批去。以人言去。總之受挫折于逆璫一也。未可作分別見也。近聞諸臣入部臣啓事者多矣。如詞林錢謙益。文震孟。姚希孟。科臣許譽卿。葉有聲。寺臣倪思輝。倪應眷。臺臣方大任。王政新。劉有源。一經拔擢。輿論翕然稱快。敢又舉其所遺。及臣所知者。在九列如鄭三俊。余懋衡。畢懋康。趙時用。畢懋良。徐夢麟。須之彥。在臺省如解學龍。張鵬雲。劉芳。胡永順。李元陳。必謙。蔣允儀。李徵儀。李日宣。在部臣如唐暉。李白春。孫必顯。方孔炤。皆當並復其官誥。以需起補。蓋欲盡蒐遺棄之賢。須劈破論劾一門。欲大闢登進之階。須撥棄東林門戶四字。東林何罪。乃以錮天下嚮用之路。楊左何罪。乃

以被東林不諱之名，竊以今之東林，卽漢之所謂甘陵汝南也。今之楊左諸人，卽漢之所謂李杜范滂等也。禍雖烈于一時，名實重于千古，乃屢旨昭雪而未見恤錄也。屢旨恤錄而未見恤錄也。正氣久鬱忠魂上薄，昨者陰霾蔽天，暴風終夕，無亦厲鬼憑之，而冤氣作沴者耶？所當再釐明旨，立賜施行，以舒衆憤。雪幽魂者也。臣草疏已成，適奉明旨，邊才繫封疆，科道官各舉所知，以備採擇。臣閱年來，拮据關上，勞苦功多，無如閣臣孫承宗，入則皋夔之選，出則韓范之亞，以之握兵樞而控中外可乎？次則李邦華之撫天津，尹同皋之撫蜀西閔，夢得之督黔，皆以實精神爲實經濟，持甲兵數萬鎖鑰一方，勅以行邊壯虎豹之勢，而寒鼯裘之胆，其庶幾焉。若藩臣吳國仕、仙克謹、吳光義，皆以特達之才抱丹赤之衷，並當授之節鉞，以儲邊關之需者也。邊才之難尤難于將，將難于膽而有略，勇而能廉，臣嘗執此以提衡諸弁流，臣同邑人副總兵查國寧，昔年經營海上，精兵如虎，利器如霜，極受閣臣知遇，今奉旨昭雪，副總兵茅元儀，皆同功一體，足當秉鉞之任者，乃實心任事，擯棄投閑，封疆安得眞才而用之，敢并及之，以充樞部夾袋之資。臣銜使粵東，不日且陞辭矣，敢不避忌諱，謬陳所見，以備採擇，惟皇上少裁察焉。

### 辭免川功敍錄疏

巡按廣東監察御史臣吳謹奏：爲川功謬蒙敍錄，乞恩辭免，以明功實，以安愚分事。照得川功分解圍復城、搥窯三案，又從三案別多寡，而查覈既詳且確矣。諸文武官數年間，關百戰之勞，屢經抑鬱未錄者，乃今次第獲就甄擢，斯亦仁聖之世，無幽忽而不耀光明之一端也。維時七年用兵，督臣以一身始終其事，

而按臣相繼受事者前後凡四人或三案有功或二案或一案皆身履其事而職則從督臣查敍一疏稽勘而覈之者也樞臣以職在勘功猥列名一案之末遂蒙皇上優陞京堂之旨夫以勘功而列於功與旨所謂身在封疆者不侔也以二年後而勘二年前之功與旨所說年月相符者不侔也此臣自循省而必不敢居也況勘敍一疏以不能歸功逆璫幾令諸臣之勞苦埋沒不彰乃方敍而職列其名何以辭於諸臣殿功邊功諸臣冒濫加銜者職首糾之方糾冒濫而忽自入冒濫之中又何以辭於殿功邊功之諸臣職小臣也例不敢辭又驅驅粵東數千餘里得閩邸報實遲則職今者之辭免猶爲晚矣伏乞皇上鑒職愚悃俯允辭免微獨循愚臣之職分而亦可昭敍勞賞功之大典矣職無任隕越待命之至

辨明巡青點陪疏

巡按廣東監察御史吳謹奏爲謹述巡青點陪之因以明心迹以乞罷黜事臣按粵東巡歷至雷州府忽接邸報見科臣韓一良聖主求言若渴一疏臚列往日陪點諸臣中及於臣曰巡青御史吳尙默巡青一差是劉重慶爲正而臣陪之者也重慶循次而題臣循次而陪越正點陪時共訝之臣亦深自疑之巡青何差舊制所爲季差而新改中差者也臣衙門有老差有大差有中差而巡青又中差之最次者也使逆璫果有意於臣老差大差何難越次授臣而第以巡青點差耶臣不幸而所陪者重慶也逆璫以重慶爲楊漣之黨見嫉有日矣借題差以驅黜重慶而非故以差授臣也然而不與重慶同罷黜者亦有故當乙丑夏秋間諸臣交攻逆璫正臣受命按蜀馳驅道路之日諸臣皆有疏而臣無疏以故逆璫意中無臣而

意中亦實非有臣也。故以無甚關要之差置臣閒地耳。臣待罪臺班七年矣。在廷則有建白諸疏。在差則有地方事宜諸疏。簡而繙閱之。有一黏帶逆璫作從諛語乎。臣無以解。一時諸臣作緣於逆璫者。首建祠。次稱功。又次加銜。三者有一於臣乎。臣亦無以解。按蜀天西數千里。當諸臣交攻逆璫之時。極恨不獲末附一名。以擊權姦。巡青追隨班行者。一年有餘。當諸臣交頌逆璫之時。必不敢旁涉一辭。以希倖躐。此臣之心迹。在朝諸臣皆目擊之。而臣亦可自循省者也。獨不幸而有巡青一差也。臣不得與重慶同驅黜。卽愧重慶多矣。卽愧於言官之風節多矣。仰惟聖明亟賜罷斥。以明臣節。不然令臣引疾。以乞休致。俾得歌詠休明之化。恩不啻天高而地厚也。海邦使臣無任激切待命之至。


### 弭寇防海疏

巡按廣東監察御史吳謹題爲治粵莫先於弭寇。弭寇莫先於防海。謹采羣議。築險固圍。以垂永賴。事照得東粵介嶺而濱海。而錯壤閩與虔之間。虔寇嘯聚。而以粵爲藪。閩寇跳梁。而以粵爲壑。兩者歲爲粵患。而海寇披猖尤甚。往一敗蠻於鄭芝龍。今再喪失於李芝奇。歲繕舟師。以驅擊之。而無以遏其狂燄。祇以供其餘燼。夫非盡師不武。戰不力。備不豫也。彼有所挾而咆哮。以大海爲百二也。我小船不敵彼之大船。我少船不敵彼之多船。我陳師原野之衆。不敵彼之興濟與汨。習波濤而狎天吳之衆也。以所短攻所長。未有能得志於賊者。有實著於此。以之攻擊不足。以之捍禦有餘。摧彼惡氣不足。固我居圍有餘。則隨沿海之港口。相其險阻。扼其要害。大而築銃城。小而築銃臺。或對峙。或錯置。調兵哨劄守之。賊舟泊近。小大

銃炮齊發攻打之未有不碎其舟沉沒其人者此以高臨下以主待客以守兼攻用我所長破賊所短未有能得志於我者也因檄各道隨所轄而相度焉規畫焉會省以虎頭山爲門戶天設百粵咽喉往開總兵府鎮其間最長慮也今因基庀工築百雉而城之計宿兵聚衆於此而外聯艦艍爲重鎮又遠近築四銃城以爲犄角如馬公灣如雞籠頭如魚珠如赤岡或獨踞海心或雄峙海口皆握奇控要壯虎豹之勢則省會之大形勝也其次肇慶府則陽江最近海而北津之一城三臺雙魚之三臺扼其吭要其次高州府電白吳川最近海而蓮頭港口之三臺限門入港之左右四臺踞其關鍵其次潮州府則柘林最當賊衝而風吹嶺之一關新村口之兩傍四臺當其阻隘至惠州之甲子二臺海豐一臺瓊州之文昌感恩各一臺廣海衛之小灣南門角各一臺雷州之通明港一臺各隨其地勢爲鎖鑰而沿海二千餘里之形勝略具是焉漸次鳩築今且有報竣者有垂成強半者大約一年內瀕海郡邑塞所各設一金湯各成一天壘庶幾杜賊窺伺之心而褫賊跋扈之膽此其議創發自諸士紳督臣同諸司道參酌勘定而臣以末議佐之其費罔敢動民間一石一木皆督臣同藩臣鹽臣各道臣搜括設處而臣間以贖鋟助之但諸臺城既有成緒調兵增兵銃械火藥所需餉銀不貲粵東餉銀徵之丁糧者十之六取之橋廠稅課者十之四藩臣鰥鶩然憂不足近編書兵餉考每年缺支四萬有奇而部文且議增於額解增非派之商民則縮之司餉今日之商民已剝骨及髓派之一字非所忍言而今日之東粵山海交証兵食兩詘縮之能令庚癸無呼乎臣巡歷一週而頗有稔乎地方情形矣內寇外寇未有充斥於粵者也犴獄土宄未有狼藉於粵

者也。豪民之黠而思逞，凌軋而好亂，未有橫縱於粵者也。內雜猺黎澳夷，而外逼番舶，交搆起釁，未有叵測於粵者也。未雨桑土，未火曲突，當事者無以粵爲無事之國，而又以粵爲有餘之地也。謹會同總督兩廣軍務兼巡撫廣東地方兵部右侍郎兼都察院右僉都御史王略陳築險本末而并及之。仰惟聖明垂察焉。伏乞皇上勅下該部覆議施行。

魏忠賢、客氏、崔呈秀之伏辜也。公實手定爰書，刊布中外。今請定罪案，及佐新政，起廢籍三疏，字挾風霜，猶凜凜乎有生氣焉。公登萬曆丙辰進士，釋褐義烏令，以連左光斗二公薦入爲御史，固宜侃侃諤諤，不踰大節。無負於諸君子哉。又少喜談兵，故籌蜀防海，無不洞識機宜，言皆有物。其所著尙有獲言數十卷，上自邱索下迄同時作者，依類編輯，而於兵事尤詳。惜屬草未就，身歿之後，傷於屋漏，頗難甄錄。覽者不無遺恨云。嘉慶六年二月後學趙紹祖識。



草疏臺諫仲伯

著銳鄭 欽鄭

本館據涇川叢書  
本排印初編各叢  
書僅有此本

伯仲諫臺疏草

# 伯仲諫臺疏草卷上

明 蘭石鄭 欽著

## 條陳六事疏

戶科給事中鄭欽謹題爲仰陳德意、敷求實政、以永保治安事。臣惟聖皇在上、而天下蒙久安長治之福者、致治有實功、而用人有實效也。臣濫竽言責待罪、該科披閱章疏、恭覩皇上嘉納敷奏、訓勅臣工、屢有從實舉行、實心幹理之諭。今歲四方多警、災害異常、伏蒙聖慈加意、民瘼蠲租發賑、停刑罷役、優恤之恩、等於天地、竊俯而思曰：君令而臣弗共是不忠也、德施而澤不究臣之咎也。頃者冢宰員缺、仰荷宸聰慎簡、至公爲國之人、以膺眷命、而臺卿閫帥皆極一時之選、中外臣工、罔不幸正人之柄用、憚吏治之嚴明、洗心滌慮、精白寅恭、以求報効不遑矣。顧臣蠡測管窺、何能竭涓埃于萬一、然誦聖謨而惕念威時事而激衷思救弊、以補偏、敢循名以責實、用據一得、條爲六事、惟聖明垂覽焉。一曰定國是以正人心、臣竊照人才有淑慝、而政事關焉、政事有治忽、而是非係焉、聖天子運乾綱於獨斷、而分庶職於百寮、寄耳目於臺諫、而總權衡於部院、百官有賢不肖、許臺諫風聞論列、非私臺諫也、所以廣視聽而防其壅也、臺諫有可否、下部院查覈覆奏、非私部院也、所以審羣言而折其衷也、邇來爭端滋起、辨訐成姦、憲臣曰：部臣宜斥、部臣亦曰：憲臣宜黜、一人刺之爲非、一人又執之爲是、甲可乙否、堅白異同、建言者似出公心、報復者殊涉私意、所以然者、良由國是未明、而人心不古耳、夫國是未定、而欲使議論之協一、是猶止嬰兒之啼。

而塞其口也。仰惟天威震懾海宇。澄清人心。土習大異。疇昔矣。然士路已清。而類風未振。法網日密。而實裨罕聞。弱者因循以觀望。雖國虧民苦。勢迫於燃眉之急。而姑且爲之徐徐。強者逞辨以飾欺。雖事煩民擾。明蹈夫覆轍之虞。而猶肆利口之喋喋。任勞任怨者。百無一二。推奸避事者。十恆八九。負清修之譽。或飭貌而不飭心。徇破格之名。或采文而不采實。將欲舉之而無名。則曰彼曾不附嚴氏。將欲刺之而無名。則曰彼曾濡足嚴門。殊擢所以待異才也。而便給爲能。貪淫不檢者。亦得驟登夫顯秩。何以作天下之忠勤。起廢所以需幹濟也。而桑榆暮景。尺寸未酬者。亦得冒獵夫崇階。孰不以終南爲捷徑。撫按係外官之表率。守令爲生民之父母。好惡不拂。傳嘗言之。愷悌君子。詩嘗咏之矣。往見爲監臨者。徒以簿書督責屬吏。爲守令者。多以深刻承望風旨。上官喜罰贖。相率剝膏削脂。以快其私。上官喜搏擊。相率破家滅門。以投其好。案無留牘者有矣。恤民饑寒者誰歟。不畏強禦者有矣。救民疾苦者誰歟。連篇累牘。盈庭皆卓茂之才。問俗觀風。觸目盡凋疲之狀。是何列諸薦剡者有餘。而徵諸治功者不足耶。抑何張湯虐政多宜於此時。而召杜仁風不可見於今日耶。近該銓司留心郡邑之賢者。請加服俸。蓋出格之典。激勸之機。無非爲生民計也。但恐希望者或不求其實。昧上意向。目循良爲俗吏。務峻刻爲丰裁。則恤民適以病民。盛典不爲厲階乎。據已往之積習。允將來之明鑑。當此賢哲奮庸之日。孜孜汲汲之秋。苟不定畫一之章程。而徒更一時勢。立一法制。易一歲月。新一見聞。非所以培元氣而長國脈也。合無勑下該部。俯察邇言。大加振刷。際盛治昌明之會。酌大中至正之規。圖治務求實際。毋侈虛文。用人務拔真才。毋采虛望。度德授官。

因官取效以清修屬館翰而有耳目風紀之司者不當以穢默爲持重以廉謹律儒官而有錢穀甲兵之寄者不當以規避爲老成一拔擢也必其入而在內足以膺柱石出而在外足以寄干城者然後舉而加之否則寧循資序遷可也毋使非望之福誤及庸人以速瘳官之誚一起用也必其功施民社爲謀國老成宏濟艱難係蒼生重望者然後召而致之否則寧賜問表宅可也毋使昏髦之流徒取充位以貽伴食之譏某爲往行可嘉毋以一節信全德某爲舊疵可議毋以一眚概平生酷之害尤甚於貪則官居民收者不當以慘刻爲賢能上有好而下必甚則身範物先者不當以摻切爲任事實意擔當者務赦其小過雖三至之報勿疑也巧言令色者務灼其深姦雖衆好之中必察也再照言官論列固多風聞部院查覆自有公議言責所係誼不敢容隱聖明在上照臨如日月去留旌別天鑒昭然辨訐之風殊不可長也合無查照題准事例除大臣引過自陳以俟聖裁餘經論列者不問覈實與否宜杜門省愆聽該部從公議覆毋許輒行奏辨以滋競端如此則道揆立而衆志孚法守嚴而士風正所以興道致理者可期實效矣二曰慎陞遷以一事權臣切照全才不可多得善治必先久任我國家稽古建官內設臺館部寺外設督撫藩臬凡以國與民之責寄之也節經議覆久任之法固宜斷在必行矣然卒不免陞遷之太驟者得非沿習久而拘繩深乎是故內而卿寺或爲人那缺或遇缺推人遠不及暮近不踰月一歲數遷者有之旬日再轉者有之外而督撫或以東易西或自外補內趨迎之枕未安報代之檄忽至靖盜之戈甫息內庭之罷隨臨以至藩臬之官資俸稍深者陞改多憑於途次往來空費於將迎果爲國乎煖席未遑胡一籌

之速展。抑爲民乎。息肩不暇。奚四體之能舒。今之議者。不過曰。高位常苦於乏人。下寮每嗟於白首。他邦非此人不可。外任不容以久勞。維時與勢。不得不然。而不知率土莫非生靈。顧彼不宜失此。功化難責俄頃。有成必待三年。若一處未寧。忽遷他處。一官方授。復改他官。遍歷尊崇。一人之榮耀得矣。于朝家何賴焉。昔大禹治水八年於外。必俟錫圭告成。始有百揆之命。先年巡撫周忱輩。皆歷任一二十載。當是時。豈故疎而遠之。而廟堂之上。豈無一京缺可推者乎。孟軻氏云。進賢如不得已。將使卑踰尊。疏踰戚。可不慎與。書曰。臣爲上爲德。爲下爲民。其難其慎。合無今後用人必加慎重。毋輕授受。卿寺遇有員缺。除資望相應者。照常推補。其餘歷俸未久者。寧暫虛以待。如有正則副可虛。有左則右可虛。縱弗獲已。欲推其人。必俟一年二載之後。方可及之。毋復驟遷數四。以厭耳目。督撫正當有事安攘方殷者。必俟三載之後。考有成績。卽擢置內庭。如事方有緒未成。民方呻吟未安者。縱使久勞於外。或增以秩。或加以俸。毋復他改別遷。以失觀望。各省兩司。果係資深望重。卽酌道里伊邇。或見任地方。就便超遷。查照前任禮科左給事中鄧楚望所議。毋使朝秦暮越。不勝絡繹之勞。再照事勢。亦內逸而外勞。人情恆厭遲而喜速。臣切見邊腹撫臣有缺。廟堂會推。甚難其人。及不移時。被推者方抵任。向之不堪推者。又公然列爲上卿矣。此無惑韜精養拙者多。而殫力程能者寡也。合無今後通計。歷任之勞逸。爲敍遷之縮盈。如終身安閑坐鎮者。不使超越於折衝禦侮者之上。如此。則人得安心職業。而無觖望之私。實意爲民。不蒙速化之念。所以熙載亮工者。可期實效矣。三曰禁改調。以肅臣紀。臣切照改調之弊。與久任正相矛盾。欲久任而不禁改調。是猶

卻步而求前也。今內外官員係爲事爲民之最切者。莫如部屬守令。夫六部司屬職守各爲至要。官制原有定序。可論繁簡。而不可論低昂也。往往有假公濟私。更調靡常者。謂吏部進退人才。不宜輕授。必擇有才望者而調之。似矣。其餘各部亦皆是。則是微果何所擇而取之歟。謂兵部職司軍旅。不宜徑選。必簡有韜略者而調之。似矣。然旣調之後。又復出此入彼。豈一司馬猶不足盡其才歟。況錢穀國脈所關。刑獄民命所係。工虞孰非急務。而俎豆軍旅之事。亦非可卒辦。此部急於得人。則彼部獨可廢事乎。應調者旣稱有希望。則未調者豈皆不才乎。昔顏閔命世之才。所長各止一科。稷契名世之佐。終身惟司一事。何者。不如是。則無以安其位而行其志也。夫積習相沿。固非一日。然方今清明之時。不爲釐正。恐公心反嫌私意。將爲他日鑽刺者啓倖門。覬覦者立赤轍耳。縣之有令。最號親民。百責攸萃。官之久暫。而民之休戚因之也。往往有到任未幾。改調繁難者。卽如臣邑。二年內兩令皆以調去。以致邑政廢弛。盜賊充斥。一邑如此。他可類推矣。若云他邑多事。則此邦方且嗷嗷。若云才力有餘。則舊任亦宜綽綽矧令一調。而五害乘之。官無固志。而假願脫以要名者一也。代未及至。而委權官以肆刦者二也。上無定令。吏胥緣夤爲奸者三也。民無恆心。奸宄乘機竊發者四也。巧猾之徒。或倖其脫去。而恣漁獵者五也。凡此五害。皆臣愚所目擊而身親者也。議者欲附合己意。援疾爲喻。謂疾之未甚。庸醫可調。危急之症。非盧扁不可治。所以爲彼者。則善矣。而不知此方元氣就虛。積癰成毒。一旦潰決。莫可救藥。雖急求盧扁。亦何及乎。夫十室之邑。必有民社。武城雖小。不廢弦歌。只今邑里蕭條。滔滔皆是。長官數易。甚非百姓之福也。合無今後寧慎簡于始。無

輕改于終寧爲官擇人毋爲人擇官六部司屬一體重視除吏兵已經題准非才德俱優韜略素諸者不得擅改二部其各部員缺新選遵照舊規餘卽於內外相應衙門推補必遴訪而後授之優文學者畀之禮官善會計者委之錢穀以司刑獄必刑名之熟也以職工虞必綜理之周也如其才果優長功能茂著者卽留本部久任而擢用之如近日戶部郎中魏學曾兵部郎中張志孝事例任之不爲不重而待之不爲不隆矣何必徇壘斷之計以啓奔競之端乎至于縣令初補必視才力優劣爲邑里煩簡旣任之後果係不及者方准改調簡僻以示曲全其地方稱便者毋復假調繁名色以致偏累再照官有內外每無崇卑每遇推陞京官恆喜遲而外任恆貴速者何哉蓋京官論俸不論資外官論資不論俸此人情所以重內而輕外也合無外任如郡守等官查照京官推陞事例歷俸三年者陞以憲副五年六年者竟陞參政廉使積而至于九年者竟陞方伯巡撫之秩如此則德溥於委任之耑績成于行政之久所以足國恤民者可期實效矣四曰專責成以省添設臣切照張官置吏不惟逸豫惟以治民也民之聚而爲盜反側不靖豈得已哉蓋其始也必有以激之其既也又有以縱之其終也勢之所迫不極不止揆厥所自其過在官而不在民也聞者災害疊臻盜賊蜂起刦庫殺官攻城破邑上損國威下貽民戚節該失事地方當事者不追求致弊之由救弊之實奉旨議善後之策不曰增縣治添職官則曰加兵備復總督近該閩廣又各有兵後設縣之請焉臣每見此不勝慨噫夫官事不抑宣聖所訊冗官之議識者先之今天下藩臬郡縣各有分土正佐寮屬各有分民糧儲兵備守巡等道各有分職而又有重臣以彈壓之按院以監察之

謹備禦則有都司衛所等職防險要則有總參遊守等官一事必設一官一方必轄一職揆文奮武棋布星列可謂十羊九牧無復加矣奈何位民上者賢智則勤勞案牘以獵荐刻不肖則剥民脂膏以充囊橐兼以賦煩役重民失恆業饑寒迫膚不能自保弄兵潢池嘯聚山谷癟潰一旦束手莫支要皆官之失職非無官也卽如徽婺礦賊生發已數十年各該守土之官閉目搖手略不究禁延至刦人燬宅民急而哀籲控訴于長官爲長官者且曰有上司在不暇及此卽一處而他可知矣養虎貽患坐以待斃乃汲汲于添官設邑豈理也哉先因財紓民窮議革冗員以省廩費如川貴總督蘇常參政廣德兵備清浦縣治其始皆添設也一經革去痛快不勝今歲徵衢兵備之添設復踵廣德故事非浙江省撫按爲之調停歸併則不一二年又將有裁減之議矣夫地理遼曠人情强悍易發難制亦必有所當增設者但不揆之地方凡經失事一概陳請爲苟且推諉計切恐殘喘之區瘡痍之後不勝休養生息而供億動作廩費百出將見擾害愈增而顛連愈甚合無勑下該部務加參酌見今陳請者必揆諸地里之宜民情之便委係曠悍難制萬弗獲已者然後曲從所議毋任彼目前之謀以貽後累其已經添設如川湖等處容或有無事地方官多所當歸併者行令量照浙中事例裒多益寡以圖官民兩便仍通行各直省撫按官申飭各該司道郡縣念所在之多虞憫閭閻之疾苦爲守令者飢溺猶已視民如傷田野荒蕪何以開之流離逃竄何以復之風俗薄惡何以挽回之民情頑悍何以馴服之刑罰中教化勿恃守身之濯濯而險刻以矜能催科中撫字勿視待哺之嗷嗷而苛併以塞責保甲毋襲故套而必求寓兵于農以彌盜于未形積穀毋飾

虛文而必求有備無患以救災于旣至萬一水旱爲災積貯無備者必追究舊欠之官及地方有警不能早見預防者尤根極貽害之原一併重加斥治雖已經陞遷者亦要嚴行提究不得輕宥佐貳等官督糧管糧清軍巡捕管馬理刑原有耑職嚴加切責各求實效以不失國朝設官之意毋許舍本職營別差以妨正務兩司如兵道務率所屬練卒伍時簡教以戒不虞守巡時行郊陌省耕斂問疾苦以察撫按所不周補守令所不逮毋或自求暇逸動委有司徒了文移撫按出巡各照所屬職守悉心考核某爲恤民而稱職某爲殃民而不職某爲廉能某爲貪酷必訪其實跡可據者定爲舉刺毋或尊大其體面寄耳目于匪人惟奔走承順之爲恭如此則官不加多而自無僨事之患民免紛擾而允底輯寧之休所以拯溺亨屯者可期實效矣五曰嚴任代以圖安攘臣切照忠於事君者不謀其利急于爲國者不顧其家我國朝加意安攘凡邊腹巨鎮專設督撫重臣握樞控要彈壓保障兵馬之強弱糧餉之盈縮地方之安危所關係誠重且大也往多冒濫邊銀侵剋糧餉屢經參勘及被命赴任者相率遲延致遭論劾臣切謂撫臣所以仰荷厚恩俯膺重寄者何如而可以貪肆怠緩若此耶夫禮君言不宿于家督撫職耑閫外一受勅命卽有地方之責惄凜休戚身且不有況可枉道回家以遂其從容宴豫之私耶先經題准凡總督巡撫不拘邊方腹裏如遇陞遷事故俱候交代畢日方許離任非徒使之假宴會之歡以敍新舊之雅也蓋以重大責任非可輕投錢糧兵馬安危利病躬相授受俾舊政不隳于垂成新任藉有所持循耳頻年陞調不常遷轉靡定等開府如傳舍視勅命如弁髦爲新任者領勅私歸絡繹遷延其中固有情不容已者而要

之私便身圖。問田卜宅修炫燿于故鄉者恆多也。彼舊任之人或京擢行或調繁去或貪酷罷或守制歸相候動渝半載使久任皆陞調者猶知自檢以避物議而罷廢休致者亦坐以待繼焉則將有不肖之徒貪得無厭惟恐代者之不遲此方駐節而彼已滿載矣如江西巡撫周某久坐廣信而逼索前件數月何啻萬金寧曰甘棠遺愛延綏巡撫胡某侵剋餉銀而大誤邊事覆勘俱有實跡豈云琴鶴清風此外又有事變無容少待至情不忍久淹者如之何而可遲且緩也邇來新舊相接彼此交代不過盛張筵宴備陳儀物酬酢交歡而已迺有賊私數萬如王某等所爲者蹈常襲故玩愒因循及經查盤賊跡暴露雖奉旨追賠在不肖者固無足惜然堂堂都憲而下同于僕隸于體統不甚謬乎目今督撫諸臣一時多係新任尤宜申明法制嚴示期限深鑒往弊著爲定例伏乞天語叮嚀申飭各該新任撫臣不問邊腹地方俱刻期就道着速赴任並不許枉道回家稽遲歲月交代之日卽將前任動支過錢糧給散過軍餉或修築過墻堡或練補過軍伍田地有無荒蕪曾荒蕪者有無開闢若干人民有無逃竄曾逃竄者有無招撫若干賦稅有無逋欠曾逋欠者有無徵完若干盜賊有無生發曾生發者作何撫勦地方有無災傷曾災傷者作何賑恤一應承<sub>接</sub>事宜具悉交割明白舊任復命新任交代逐一開款具奏如仍蹈故習枉道稽遲及徒事虛文舉行不實者容該科訪聞參究如舊任官有冒破侵欺等弊新任官隱護不行稽考聽巡按官查出一併參奏斥罰如此則視國猶家而督責有耑功急公忘私而撫綏無遺力所以安內攘外者可期實效矣六曰革宿蠹以振漕綱臣切照行法者貴求其本革弊者務濬其源凡一應漕運事宜先該部給

事中張憲臣建議已經題覆臣無容復贅今閱漕司條奏首以根極弊源歸咎有司之不守漕規不遵明旨而謂謀謀于運官之貪取常例運軍之恣肆刁索爲不揣其本而齊其末臣切謂糧米粗濕及船到無糧誠當責備有司而官軍之刁蹬需索作弊啓釁實壞漕之本源也何者蓋漕運之患不過曰遲誤漂流掛欠而壞漕之弊則莫如運官之科索與運軍之缺少耳臣查得議單內開稱凡逃故軍士各該衛所不行僉補者聽各該委官比照京操官軍該班不到事發參究又稱凡把總等官索要運軍常例科索銀兩照銀數多寡問罪降級有差重者發邊衛充軍及侵剋運軍月糧行糧多索船料等項銀兩查有賊私俱照監守自盜事例引擬發落是立法非不嚴防姦非不密也奈何因循日久法紀廢弛總兵方恩狡詐沾名殊無任事之實參將福時持身廉謹而乏通敏之才其各把總之設所以約束一總督幫價運也率皆夤緣爲姦恣行科索每幫船一隻索銀一兩名曰幫錢索米一石名曰食米沿途派搭私貨責令各船包認發賣名曰貨錢抵京交糧後責令旗軍出錢雇車裝載回南名曰車錢種種名色頭會箕斂非特江西把總劉希賢爲然也如江南上江把總周軻先索新安衛翟指揮幫銀一百二十五兩及翟指揮爲事倪宇代運又勒銀八十兩到京尤復索多致本官揭債完糧卽一二總而餘可知矣夫把總貪肆爲姦故官旗通同作弊人咸以武弁庸流置之弗齒而不知關係國儲爲害實大也舊例每船一隻旗軍十名衛軍先僅撥運次及別差今各衛所官多將有田正軍賣脫而以無田餘丁補數其行月二糧又皆官旗冒領以充使費併扣還遞年補納漂流之數軍丁苦累情願幫貼旗甲不肯赴運冊載空名軍無實數每船正

軍多不過三四人過淮之時雇覓外班棍徒擰駕而刦掠偷盜之患乘之利害休戚全不相關稍遇風濤輒至漂流乃希圖羨餘銀兩爲之抵補抵補不足遂成掛欠凡此宿蠹可獨歸咎于有司乎此運官之貪肆運軍之缺少臣切謂其爲壞漕之本源也目今督漕正值初任總兵又當更置合無勑下該部會推才守俱優實心任事者以代其任督總相與會同瀝鑒宿蠹痛加剗革先將一二貪肆者究治以警其餘于各把總嚴加懲戒如蹈前弊不時參究新運在卽行各撫按責令各該衛所掌印官缺少運軍先照例住支俸糧卽將各項下精壯軍丁通融撥補務足額數方許開俸勒限先期造冊解赴漕運衙門候糧船過淮之日漕司照冊查點各軍有無足額是否精壯真正軍丁如有不足比照京操該班不到分數事例將掌印官罰降如復虛捏詭名雇覓棍徒者併行參提重究月糧務要親給安家行糧如數給散各軍毋許官旗仍前侵剋違者參究如例再照掛欠糧米邇年沿襲爲常延捱不行完納各把總又復冒領新運殊非國法合無勑下總督倉場衙門卽查見年掛欠之數將各把總嚴行參問輕則罰俸重則降級令其戴罪領運必俟賠補完日方許開俸復職如此則紀法嚴而宿蠹以清漕綱振而轉輸有賴所以裕儲足食者可期實效矣夫以上六事雖若爲不經之論迂遠之談極知螢光無補于大照而芹曝聊效乎微衷是以不揣慙愚冒昧瑣瀆伏乞聖慈俯賜採納勑下該部參酌可否見諸施行或可以爲循名責實久安長治之一助也臣不勝戰慄祈懇之至

彈劾悞事重臣速處運道早靖地方疏

戶科給事中臣鄭欽謹題爲仰關國計、俯切民瘼、懇乞聖明、並究悞事重臣、速處運道、早靖地方事。臣竊惟朝廷設重臣以布要地、莫非爲國與民也。人臣受寄托而效忠赤、莫大乎國計之與民瘼也。國計最可慮者惟運道、而總理實當其任。民瘼最可慮者惟盜賊、而督撫實膺其責。故總理賢否、國脉攸關。督撫才不肖、民命所係、必視國猶家者、斯無誤國矣。非是而檢僂酷躁、以冒竊炫耀者、鮮不爲邦家之蠹也。視民猶子者、斯無殃民矣。非是而疎虞乖玩、以僥倖陞遷者、鮮不貽地方之戚也。臣初叨言責知識、昏愚非敢過爲指摘、以傷渾厚之風。然目擊時艱、誼不容默。敢卽二事之重且急、併其臣之不忠不職之甚者、敬爲我皇上陳之。國家財賦取給于東南、而轉輸于漕運。徐沛者、運道之咽喉。京師之命脈也。徐沛淤、則咽喉阻塞。漕運隔、則命脈不通。其所關於國計、非淺淺者。先因河水泛溢、淤塞異常。上屢宸念、該工部題奉聖旨。是這運道淤塞異常、相應作速開濬。吏部便推舉才望大臣一員、前去督同河道等官、協力整理。以裨國計、欽此。吏部等衙門會推新任南京刑部尙書朱衡、改工部尙書兼都察院右副都御史、總理漕運。既受命、皇上申勅之曰：宜速往理、以副朕重國之意。及赴任未幾、復宣諭曰：因河叩佑、須人事第一、可示衡盡心處理、不拘幾日一報。大哉聖言、所以軫念運道者何至懇、而屬望於衡者何至殷也。爲衡者固宜實體聖心、不遑寧處。督率沿河諸臣、協心計議、廣詢博訪、相地里度、事勢之必可行者、因地以分工、計工以定日、刻程進報。務期事半而功倍、一勞而永逸、以不負簡命之隆斯可矣。臣聞其始臨地方、不急爲公務謀、而汲汲與河道諸臣爭接見之儀。副使柴淶謁見稍遲、而竟被參劾。郎中程某畏威疾趨、而幾致沉溺。

以致諸臣疑貳數日不相會議緩王事而競私儀大悖皇上作速開濬之旨此其凌下罔上有負簡命者一也旣而閱視河流荒唐瀰漫方寸猖狂倖倖自好不循故道妄濬支河以圖僥倖雖地方村童俗子靡不歎其乖錯臣嘗得之傳聞訪諸輿論皆謂沂山一帶土淺泉湧人夫不便挑空且間以呂孟等湖欲建築長堤勢必不能及總理河道右僉都御史潘季馴題稱沂山一帶必不可行欲自留城出口以濬故道論者皆可駁之議而謂衡之見左蓋由衡剛愎自用不能詢謀於始是以偏僻自信互相乖異于終大違皇上協心督理之旨此其輕舉妄動有負簡命者二也夫徐沛之民飢溺相仍嗷嗷待哺仰荷聖慈給銀賑濟存活蒼生莫不銜恩興頌祝聖壽億萬年衡所得于欽承者也顧乃見之不審旣役民於不可爲之地及工之難成復驅民於不可堪之法張銅鑄之刑布腰斬之令鞭笞之辱濫及于州縣正官截髮之威酷加于解夫主簿聞有典史抑夫逃亡懼罪而自縊者風聲騰播人心搖搖且當天氣寒沴謾不加恤斃非命而殞凍餒者不下萬餘則皇上濟度之民不足以償衡凍斃之命矣近聞自南來者皆云各處所解人夫初僱每名僅銀二兩今增至四五兩一名問其故則皆憚衡威過峻人人自危如入虎穴莫肯承應目今春夏之交民不聊生震驚搖動變不可測民心一失其患有甚于河者可不深爲之慮哉此其悖德虐民有負簡命者三也臣查得舊例糧船過淮定限四月先蒙皇上垂念亟勑朱衡總理河道蓋憫舊淤爲患恐新運之不前也今期限日迫糧船輻輳中外引領將謂不日而告成矣近該衡題爲欽奉聖諭事內開裏河工程南北一百餘里尙未估計今應挑濬中間四十六里挑穴天餘泉湧蜃水難以施工又自

百中橋至境山六十餘里皆須挑濬工費頗鉅除原題用銀四萬四百二十七兩三錢及漕糧三萬四十  
五百七十七石聽給各夫工食外尙該增銀一十九萬八千四百餘兩臣聞之不勝駭愕夫衡初怨望南  
曹而營謀總理惟恐求之不得大言曰使我督此工不踰時可完今授命總理已踰半年爲日不爲不久  
矣已用銀夫不下數萬所費不爲不多矣顧未挑者一百餘里至今始爲估計則前此歲月之坐視作何  
經營已挑者八十餘里功績毫無端倪則前此夫役之繁興有何實濟況其堤岸難築則糜費徒增而無  
補于事犀水施工則民力虛竭而益見其乖所以欺君誤國莫此爲甚有負簡命者四也蓋天下之事必  
誠與才合者始克有濟而遺大投艱之責必非便僻側媚者所能辦若某者本無忠君愛國之實心徒有  
飾詐文奸之利口嗜盜蹠而談孔孟假狐媚以濟狼貪歷藩臬而鑽夤巡撫夙著汚名進卿貳而冒濫銓  
曹全無善狀不思漏網之魚痛加懲創徒縱溪壑之欲延攬門徒一遇考察則揚言于人曰某我當留某  
我當去假斥陟之重典以市一己之私恩一遇陞遷則聲聞于衆曰我行取某我推陞某視賄賂之重輕  
以爲許可之優劣巡撫游某遇倭猖獗也恐以罪禍而騙銀三百張經歷之送入有徵卽一外官而其餘  
可知矣知縣賴某貪濫著聞也替謀兵部而受賄五百寧國縣之士民共憤卽一京官而其餘可知矣如  
婺福山東等處凡原任所歷之地靡不認爲故舊而暮夜之濫投雖庸墨武弁等流苟禦人國門之外一  
皆誘入門墻而苞苴之無算用鄉里過付於私門責兵馬追徵乎吏辦此其生平儉儉固士論所公非而  
近行鄙汚尤君子所不齒者始被南曹之命則思城社之莫憑依依然若喪家之狗而過爲哀乞繼聞總

理之推則幸壘斷之獲登揚揚然似出柙之虎而橫肆作爲以是質諸臯夔之列律以堯舜之朝在平時則爲巧言令色之孔王處有事則爲方命圮族之伯鯀無一可者也使處之不早則不惟無益運漕而適足以滋患害矣此臣所以深知其弊而謂國計之最可慮者也伏望皇上憫流離之擾害念漕務之迫切勑下該部將朱衡速賜罷斥或着令四籍聽候別用再照善區畫者事半功倍前車之覆後車之鑒除費過銀夫外見增銀二十二萬兩當爲畫一定計且徐沛飢溺之地增一上官則增一供應增一擾害則增一怨咨仍乞勑下該部從長計議或新河必可成或正河必當濬或運船何由暫達申勑右僉都御史潘季馴督同河道等官速爲區處或爲事體重大別簡老成實望大臣一員前去督理以求萬全如是則運道不致終誤而事旣不煩民亦無擾矣國朝之設巡撫也所以專閫率屬靖盜安民四川號天險之區素非戎馬之場也頻經流賊生發不勝陷害草竊據叛人遭荼毒良由湖省牽制督撫踈玩不能仰承德意耳近該巡撫右副都御史劉自強題爲妖逆就擒查參失事官員事奉聖旨兵部看了來說欽此又該巡按御史李廷龍題爲將官撫馭失策軍兵流毒地方事奉聖旨兵部看了來說欽此俱該兵部覆奉聖旨是這賊寇餘黨着兩省撫按官協心相機撫剿以靖地方不許乖違悞事欽此臣覆恩之皇上垂念生靈恩威並著川民之幸至矣臣復何言但臣竊料彼中之事體兼詢該省之士夫則知蔡伯貫之流毒固由羣臣失事而該省巡撫劉自強專制一方尤爲罪之首也黃中之叛據固由川臣失策而湖廣巡撫谷中虛聲勢相聯實不能逃其咎也故以湖廣言之黃中屬施州衛管轄占據支羅險寨流刦奉節鄖陽等處

賄結本管施州衛守備等官。在川民則被刦害。欲行征勦而勢難遠制。在施州衛則受其賄賂。密肆彌縫。而瞞蔽上官。是以據竊數年。荼毒一方。皆湖廣撫臣受欺乖玩。不與川臣協勦故也。又聞守備湯世傑等。受賄千金。將軍人二千。并經歷指揮爲賀寨上。黃中方出投降。及中被責下獄。其弟黨憤怒。殺軍千人。經歷跌死。指揮傷足。當事者俱未申報。此其于事體何如也。比巡撫湖廣者。安得謂本省旣已投降。侵凌非我赤子。而可謂無咎哉。以四川言之。頃者蔡伯貫之肆害。則以官軍下征黃中。乘虛竊發。連陷七八州縣。殺傷四五萬人。一時相因。誰爲厲階。則流賊之禍。黃中引之也。黃中未平。以致中路覃正秀、覃正才、散毛譚茂、遐施南、譚文漢等效尤無忌。刦虜忠州、鄆都縣軍民二千餘人。陷峒俱未追還。則各夷之禍。黃中引之也。比見任督撫者。安得謂蔡賊旣已就擒。黃中置之度外。而遂可逭其責乎。且今督撫之臣。有自簡而調煩者。必其才力有餘。可堪重任也。谷中虛一人耳。歷川湖而又轉陝西。不踰時而連遷三省。席不暇暖。將謂才力有餘。而川湖不足爲乎。則黃中以一小寇。憑凌二省。谷中虛在川中。曾目擊矣。昔知其荼毒。今任其欺誣。譬之縱虎傷人。坐視其搏噬。而猶云非剝膚之災焉。才力有餘者。固如是乎。又有自外而轉內者。必其安攘有功。特加優異也。今劉自強旣擢內堂矣。黃中之寇。十有餘年。非朝夕之故。而蔡伯貫之黨。竊發本地。又非倭虜之來。不可測者。比顧乃縱其蔓延。任其刦陷。聞旨住俸戴罪。然後上緊奮勦。雖有擒獲之功。何足以贖其喪失之罪。今劉自強報功之疏。猶謂官兵全捷。地方已寧。蒙恩准令開俸。竊恐生靈之塗炭。中黨之肆逞。皆誰之尤。譬之受牧牛羊。立視其斃。乃曰我將反諸其人焉。安攘有功者。固如是乎。

然此特其已然者耳。今黃中假投湖廣黨衆肆害川兵久困糜費湖兵受餌逗遛人心惶惑莫知所終方春妨農飢饉尋至臣恐川民之禍不至乎黃中而又別出一蔡伯貫矣矧聞其賊衆不過二三千也其寨險亦非算子坪、蜡耳山、香爐山比也。彼皆剿平而此獨不可剿乎。比之川湖雲貴土司黃中特萬分之一耳。今各土司觀望者衆若不亟爲剿平則各夷輕視而謀動禍且蔓延各省矣豈懲一警百之道哉。即今新舊更替谷中虛既轉陝西楊豫孫尙未出京劉自強已陞京堂譚綸尙未入蜀當拯溺救焚之時而值兩省主將遷轉之際臣恐上之主事者去留在念而無固志下之任事者從違靡定而有懈心藥未痊病而醫無定藥能保元氣之不大傷乎。此臣所以心虞其變而謂民瘼之最可慮者也。伏望皇上憐赤子之久困憤賊黨之橫害勑下該部將谷與劉併賜罷處或念其素望頗優重加罰治責令彼此協心盡剿中賊之餘黨盡復刦陷之戶口方許交代離任夫如是則玩寇殃民者知警而民害早甦地方允賴矣夫卽二事而較言之朱衡巨奸檢詐心猶大壞士風谷中虛劉自強清謹素聞官箴尙無物議似不容以概論然一以誤國一以殃民三臣之罪則均原於國計攸關民瘼所係故敢不避狂瞽不惜嫌怨祇陳于君父之前也懇乞容覽察臣一得之愚並賜究治則天下幸甚臣不勝激切戴罪之至矣。

明史朱衡博衡循盛應期新河遺跡議築堤呂孟湖以防潰決河道都御史潘季馴以爲濬舊渠便議與衡不合衡持益堅引鮎魚薛河諸水入新渠築馬家橋堤以遏飛雲橋決口身自督工劾罷曹濮副使柴淶重繩吏卒不用命者給事中鄭欽劾衡虐民倖功詔遣給事中何起鳴往勘工垂竣矣。

及秋河決馬家橋議者紛然謂功不可成起鳴初主衡議亦變其說與給事中王元春御史王襄交章請罷衡會新河已成乃止按史所言衡才略固有過人者然當時之悻悻自好及虐用民力亦概可想見而新河再決而後成其間不無生靈之被害者則亦未可謂當日諫塗諸公全不識經濟務也今邑志但附公於其父懿行傳鄭志亦僅具官閱而公之崇論讓議皆不得著豈所以傳信哉因刊公諫草而識之於此嘉慶五年三月廿二日後學趙紹祖識

# 伯仲諫臺疏草卷下

明 雲石鄭 銳著

## 留都銓部考察不公大臣去留不當疏

陝西道試監察御史臣鄭銳謹題爲留銓大臣欺上行私久玷清議懇乞聖明處分以服人心以答天意事臣惟人君之治忽在庶官庶官之臧否繇冢宰況留都漸遠王畿大小臣工所賴以核實而去留者惟吏部尙書得而專之其權亦重矣苟任用匪人而徇之以私意則臧否一混而去留悉乖欲以服人心答天意焉可得也昨者彗星示異伏蒙皇上允言官之請循例考察京官事方竣而星遂回此皆皇上君臣交儆至德格天所致爲留銓大臣如潘晟者亦宜秉公考察仰體皇上盛心可也孰意其奸貪姿縱欺上行私有若是其甚焉者乎近覩南京戶科給事中傅作舟等湖廣道御史陳堂等各疏詞一則謂部院大臣考察私庇親識一則謂銓部大臣考察徇私臣竊以皇上勵精圖治際世道清明之會內外臣工咸知淬礪以求效明時而獨有袞縱不職濫叨留銓如晟者殊可怪也譚者曰皇上進退人才毫髮不爽有臣若此首斥無疑矣及奉明旨潘晟、張岳着策勵供職欽此仰見皇上天高地厚之量優禮大臣之心或不忍以一時而遽棄之耳何敢妄瀆天聽哉但頃聞人言嘖嘖僉謂貪肆如晟卽南北大臣中所僅見者謹冒昧爲皇上陳之朝廷馭世之權莫重于退不肖臣子欺君之罪莫甚于徇私黨此雖在一命之臣尚不敢自私而況身爲冢宰尤庶官之表率者乎其在無事之時尙不可少縱而况職司考察尤艱陟所攸繫

者乎。晟之罪狀，往歲言官所論列者，計十之六七。近時科道所拾劾者，僅十之二三。且臣任浙中，詢之士夫，訪之鄉里，靡不切齒。細察其故，則干請之書，徧及于有司。雖三兩五兩來者，不拒。弟侄之屬，橫行于驛遞。縱一夫一馬，取之無休。其他張聲勢而撓公法，市威權而虐良民者，不可勝數也。夫以晟之平日，所不足于輿論者，既如此。其素著，晟之今日，所不滿于言官者，又如此。其僉同臣不敢復贅矣。姑以考察一事論之。如南京兵部車駕司郎中呂若愚、刑部山西司郎中包大爟，是二臣者，奸貪顯著。公論所不容者也。晟則以親之故，庇若愚而姑置之不及。又以岳之故，庇大爟而姑列之浮躁，甚至陽爲囑託，而挾制屬官。陰肆詆誣，而中傷同類。晟之用心，亦狡矣。果曷故哉？以爲不如是，不足以塞衆口，而掩公道云耳。幸而考察疏一進，而明旨獨以包大爟着照不謹，例閑住人。莫不曰：皇上明見萬里，何若此其神也？及南京科道官糾十二臣，而明旨復以呂若愚着革了職，冠帶閑住人，又莫不曰：皇上總攬乾綱，何若此其斷也？惟晟則猶肆然在位，卽訪之輿論，則甚有不平者。蓋以考察之權，潘晟主之。張岳佐之也。呂若愚、包大爟，惟潘晟得以私庇之。張岳不過爲之協贊而已。今若愚、大爟俱蒙罷黜矣，而潘晟當何如？譬之同謀而犯罪者，爲從既坐，而爲首者可倖免乎？夫皇上意欲汰不肖，而晟則敢于庇不肖。皇上意欲布公道，而晟則敢於徇私情。是晟之欺罔朝廷人所共知。晟之首宜汰斥彰彰明矣。況人言張岳之才力聞望，固不同于潘晟。而潘晟之衰縱貪汙，則大異于張岳者。若于岳則處治，而于晟則姑留焉，無乃大拂天下之人心耶？臣恐公論既淆，則法紀

日弛法紀既弛則國威不振此臣所以不敢隱忍于君父之前也抑臣聞孔子之論事君則曰勿欺也而犯之又曰臣事君以忠愚而欺上行私肆無忌憚其于事君之道亦甚悖矣又聞之語曰知足不辱知止不殆愚而貪位希進恬不知恥其于止足之義不亦甚乖乎恭惟我皇上素以忠誠率下以恬退勵臣安可使欺罔行私貪進無恥之人一日容于堯舜之世也伏乞聖明博採輿論俯察臣言勑下吏部將潘愚亟行罷斥另選誠實忠良端方直亮者以充厥任庶乎公道明而人心咸服和氣盛而天意可孚卽唐虞三代之治化不是過矣臣愚何幸而躬逢其盛天下臣民又何幸而共沐其庥也耶

植綱常疏

陝西道試監察御史臣鄭銳謹題爲輔臣忠孝迫於兩難懇乞聖慈酌去留之權宜以植萬古綱常事臣聞君臣之義固無逃於天地而父子之情尤莫解於人心故情可以掩義不可以奪情此萬古之綱常無容一日少踰者也恭惟皇上獨稟異資嗣承大統講學勤政孜孜罔輶誠天生聰明不世出之主也時有賢宰輔受先帝付託之重日夕贊襄圖維化理環海內外莫不頌聖君賢相之大有造也頃者元輔張居正忽聞父憂荷蒙皇上眷顧之誠肫肫懇至勉留之旨慙慙寵錫臣等伏讀溫諭亟歎曰此曠古所僅見也蓋皇上推心置腹於元輔真不容一日離左右者而元輔受皇上腹心之寄又豈忍一日違於君父之側哉但以臣愚細察元輔之心誠有兩不得已焉者初以父制當守乃人子迫切之至情故陳詞乞歸至再至三是不忍不去者固其不得已於親之心也繼以君命當遵乃人臣報主之大義故疏請辭俸

在京仍候大禮既成預允歸葬是不容遽去者尤其不得已於君之心也幸蒙皇上博採臣工之輿論俯鑒元輔之悃衷特降明旨云卿爲朕勉出朕心始慰這所奏俱准歸葬一節還候旨行凡誦聖諭者咸謂皇上留臣之切也如此待臣之厚也如此納言之勇也又如此臣以書生下吏蒙皇上拔置臺列試職以來日以圖報爲念昨於元輔之求去也旣不能爲皇上懇留茲於元輔之勉留也方將爲皇上私慶耳又何敢妄爲異論以瀆天聽哉但近奉聖旨今後各衙門有重大事情科道官知而不言俱以不職論斥欽此臣連日詢之臣庶中羣議迭出叩之則曰元輔受顧命佐聖君可謂忠矣如孝何臣於元輔明辱薦拔之恩雅有師生之誼驟聞此言而不爲一白臣不忍也然去留之權在皇上非元輔所得自由有此人言而故爲緘默臣不敢也且忠君孝親萬古綱常所繫事情重大孰過於此言官者敢與天子論可否者也若知而不言甘蹈不職之罪臣又敢自安乎故敢披瀝愚衷冒死爲皇上陳之臣幼讀傳記有曰孝者所以事君也又云求忠臣必於孝子之門切謂忠君者必先於孝親未有不孝其親而能忠於君者也恭遇皇上素以孝思奉先帝且以孝道風天下將不以大孝望元輔乎今覩元輔之疏一時若爲皇上勉留推其一念之眞誠終未免割愛於其父元輔之心亦甚苦矣當此兩難之時若不曲爲權宜之計恐非所以安元輔之心也臣竊思之皇上此時大禮未舉時猶可待也倘蒙體念父子之大倫垂憫元輔之哀懇暫容其奔喪圖葬使得以少盡人子之情仍勅其依限回京又有以終全大臣之義此豈直元輔舉家世世感恩而已將使天下爲臣盡忠爲子盡孝者莫不曰此皇上風之也又使萬世而下稱元輔爲忠臣爲孝

子者亦莫不曰此皇上成之也載之史册勒之鍾鼎皇上其萬古綱常之倡乎而君道相業寧不益隆於前代也耶臣叨冒言責愚昧無知近見皇上覩星變之異痛加修省鑒言官之疏慨賜嘉納是以自幸遭逢之偶敢據一得之愚冀植萬古之綱常寧避一時之鉄鉞伏乞皇上俯垂寬宥曲賜裁行臣不勝戰慄待罪之至緣係輔臣忠孝迫於兩難懇乞聖慈酌去留之權宜以植萬古綱常事理謹題請旨

棍徒結黨虐害良善凌辱大臣疏

巡視西城陝西道監察御史鄭銳謹題爲棍徒結黨橫行虐害良善凌辱大臣乞賜嚴究以飭禮法以靖地方事臣惟聖王所以範人心而維世道者特有禮法在也矧京師蠶穀之下尤禮法所自出四海所具瞻者我皇上臨御以來屢詔百司申嚴法紀中外士民翕然嚮化罔敢踰越庶幾唐虞三代之盛矣不謂猶有兇惡棍徒結黨橫行虐害良善凌辱大臣恣肆而無忌者臣職司巡視事干地方切恐漸不可長敢據實爲皇上陳之本月初十日據阜財坊總甲伊雄報稱協理戎政兵部楊尙書被不知姓名人一起譖罵趕打等情臣聞之不勝驚駭隨行本城掌印兵馬王典查報間據呈本月初八日未時分尙書楊兆由宣武門大街經過被錦衣衛總旗韓朝臣校餘傅宗仁等一起棍徒騎驢進城衝突轎前全不遜讓當有阜役喝令迴避伊等不忿口稱我們兄弟十虎誰怕你官等語惡言譖罵毆打阜役本官初以爲醉酒無賴之人尙置不較隨拜本部侍郎鄭洛方入廳中惡等兇忿未息仍復趕進宅內嚷罵不已聲言要行打碎牙牌等語比叫該坊總甲拴捉衆惡跑走止獲韓朝臣傅宗仁二人鎖鋪候次早呈解間本官查係錦

衣衛人役隨差人取送該衛去訖等因到臣臣切以部堂大臣皇上所敬禮者也在庶官且不敢慢而況於平民下役乎錦衣衛屬兵部所統轄者也在長官且不敢抗而況於總旗校餘乎軍民迴避官長原有定制各犯公然衝道卽令迴避分所宜爾乃旣抗辱於塗撻其役從復行趕進宅內攘罵不已其施于大臣如此則自大臣而下又不知何如矣卽一時兇悍如此則平日橫惡又可知矣各犯何所恃而敢爲此哉臣備訪之韓朝臣等平日倚恃錦衣衛聲勢結義十弟兄號稱十虎橫行各城地方非朝夕故矣在西城則有李七卽李拱詹大卽詹計福吳古崗賈三白雲焉在南城則有李二景永受焉在中城則有牛二焉臣猶未敢遽信復行該司查訪相同據其挾衆逞兇凌虐平民賭博局騙霸占巢窩之類難以枚舉姑卽其甚者言之如奪人妻女則李拱有陳愛兒詹計福有司嬌兒吳古崗有李官兒牛二有陳香兒各婦見在可證如科斂民財則擅派水戶陳江王見等月錢詐騙人戶龐儒等會銀各家逐一可審如白晝打搶則夥糾張成仲玉等在于南城地方搶奪龐儒銀物打落二齒見有光棍卯歷可查如盜拐人財則窺見王監丞妾劉氏婢何氏姿色串通鄰人閭守志夜半潛入其家將二婦勒拐盜出金首飾壹副銀壹錠窩藏金箔銜輪流姦宿首飾銀兩各分入己錦衣衛有卷可查至于霸姦宣武門外娼女任氏將伊寡母謀死李拱則強賣其女得銀五十兩袁鐸其買主也詹計福則霸占其宅舍賣銀四十餘兩未見其知證也惟其平日構黨橫行藐法干紀無所不至地方軍民畏其勢惡莫敢誰何是以放縱得肆敢爾凌辱大臣恬無忌憚遂至于此今二犯雖已被獲而各黨尙未拘拏非奉明旨嚴行究治恐將來效尤成風凌

上虐下越禮犯分大爲都城之蠹殆不止如韓朝臣等十虎已也故敢冒昧上陳伏乞勑下法司將已獲韓朝臣傅宗仁及未獲李拱等一併行提嚴究前項惡跡盡法處治庶幾禮制明而兇奸斂戢法紀飭而良善安生其有裨于輦轂風化者匪淺渺矣臣愚幸甚地方幸甚

糾儀疏


陝西道監察御史臣鄭銳謹題爲糾儀事本月十七日早恭遇皇上萬壽聖節該臣等於丹墀侍班糾儀行禮已畢鳴鞭後突有一男子頭帶儒巾身穿青員領手持黃夾板一副跪在丹墀高聲稱上萬歲太平策當有錦衣衛官校執之臣等詢問自稱係浙江紹興府餘姚縣儒士韓萬年臣等切惟萬壽大禮殿廷禁地止該監生人等隨班行禮韓萬年卽係遠方儒士亦不當混入班行臣等審問所稱儒士原未經考納明係棍徒詐冒衣巾擅入宮殿門已爲法所不貸況所稱萬歲太平策果有愛君祝壽之誠亦當遵制投入通政司轉進豈可於大庭行禮之後而突出高聲混亂朝儀若此臣等參照得方今聖明之時法紀清明上下官民恪守惟謹惟是遠方異端棍徒鼓譟虛談惑亂正論今乃敢越赴京師擅入禁門姿肆無稽之言希聳天聽此而不究恐干紀效尤漸不可長伏乞皇上勑下法司嚴加究治庶法紀可清而朝儀益肅矣

公與吳中行同出張江陵門下江陵之奉旨奪情也公先有植綱常一疏其所以周旋於君父師生之際者婉而能深使當日果出於此則中行等之搏擊自姿者可以不發而江陵亦可免於後禍矣

而奈何其不見聽也。惜明史既逸其事。而邑志亦僅同其兄附父懿行傳中。今讀諸疏。則公之不避權貴。其風采發越者。可以想見。而植綱常一疏。尤卓卓千古云。嘉慶五年三月廿三日。後學趙紹祖識。



業釣堂修敬



詳不人撰

敬脩堂釣業

本館據仰視千七百二十  
九鶴齋叢書本排印初編  
各叢書僅有此本

# 自敍

此苦口也。自乙酉九月至明年五月。約三十餘上。淪廢過半。僅存十五。在當日以爲空言。在此日以爲謔語。不知千載後。當作一古話否。口舌應亦有運在處。□□□□。而胡爲乎非時之鳴。前此更有血書五六百字。以檄江上諸公。蓋不中聽。爲魯監國攜海汨去。田氏橫可式臨之。

# 敬脩堂釣業

## 第一篇

臣惟艱難者所以啓聖憂危者所以致治昊天不弔降此鞠謗九廟諸陵慘於風雨凡爲高皇帝之子孫臣庶誰不奔走悲號願從地下古無成旅尙欲孤創奮興復光絕業況今天下保有十三追悼舊德者所在而起錢江一帶義旗高舉屹不可動主上以神明之貽天日之表謙恭慈惠播遷之餘俯從推戴監國以來善政日出彬彬郁郁漢官威儀從此日大旣以留未去之人心因之鼓方張之戰氣夫此千百爲羣竿木睨口至於肝腦塗地日試鋒鏑而不退避者此其人皆吾二祖列宗所式靈初無所求於主上亦非要結以爲勸也而主上幸而得此則所以剔遠不道昭我初服者豈有他求哉臣惟古之中興有二迹勢旣分取效遲速不倫奮業者必審吾所處何等而經綸出而功德歸不然者指向疑闕所務非所急拘澄平之具徒貽累歲月勿尙也當夫規模式張德澤未艾猝然內變而外患乘之主術不光神器失守幸老成未謝宿將猶存宗室之賢者奮起嗣服次第誅芟罪人斯服宛然故物炳炳麟麟蓋功在整頓收拾之間非有所大創爲也若夫故事所沿積有害累怙平貪飽畏見兵革天下大勢痿痺不可舉兼以奢淫日長物力愈誦病在風俗禍生氣運崩解之見不以時日完者在敵我無所恃但以祖宗之身義不可已高深不足以爲險士馬不足以爲鬪芻糗不足以爲備子然振拔欲以挽扶帝命噓留人心式我九有復見

太平豈不難之又難。蓋英武與開創等而破除體例。尤貴神斷。更未易言也。開創之主義。不返顧天之與否。未敢必而無不迅起疾赴。身冒矢石。備嘗荼苦。與其同事。故有布衣昆弟之心。略去形迹。不修文飾。而太阿在手。賞罰斷斷。不蓋不乘。財物婦女。皆所不取。作法龐古。事事近質。甯不識字。不嫻禮。而尙功播德。收人心以基天命。所爲旦暮不能去諸懷者。中興之主。固不難仗此英武。以比於初造。而臣民之心。執謬虛體。緣依故例。卒不可拔。夫衣冠講讀。高居深拱。豈不威神。而內外虛冒爲功。乞請自便。養恬長傲。美聽悅觀。猶之先代。是所以失之者。乃不復更改。欲復藉是得之。亘古以來。未之有也。主上勿以此座易與。夫開創不成。一身之故耳。中興不成。二百七十九年之神靈所鑒視。臣一念及皮骨爲驚。用不敢隨衆過爲阿歎。進此痛哭。惟俯察而進擇之。

第二篇

日者進取浙西。有命所云。攻其所不備。亦攻其所必救。萬全之策也。浙西士民。且持空拳行助一搏。迺奉旨。著總兵張名振以舟師向尖山。二十日於茲矣。奉傳著科臣祁熊佳監。名振兵速渡。又十日於茲矣。天下事。爭緩急而難易。因之爭難易而存亡。係之在此日也。前無有知海甯事者。十日之內。輒印綬補缺。失事機者一矣。前海甯額糧九萬有奇。吾可就食。十日之內。印綬者刻期徵取。失事機者二矣。前果疾渡。可先守而後戰。十日之內。彼已入據。而我徒恃戰處勞。失事機者三矣。前下邑或有未薙髮者。偵探機情。便十日之內。已盡薙辯。失事機者四矣。前浙西遁匿官兵。曾戰口習口易口。故死不就口。可呼入伍。十日之

內無所逋逃失事機者五矣。所謂愈緩則愈難。愈難而危亡立至。□乃陽當堅而暗分兵東下。天下事尙忍言哉。而名振反盡撤所部兵還寧波勢必有他向。且有作奸百呼有不應矣。不如于各路新至之師選鋒五千。旦晚卽發。尙可有爲。郡邑雖陷沒。而人心未去。刻望王師。則一便。浙西奮義者。尙出沒湖泖之間。專待策應。則一便。嘉湖所屬。具少眞□。寔寡備。以中國戰中國。不必讐其名。則一便。豪傑之士。髮去而心死國。一呼編戶可起。則一便。日來諸兵雲集。乘此勝勢。不令坐鈍。所向自力。則一便。兵多勢必難保。久且散。不如速進。因糧於所陷之地。則一便。今擁戰卒者。未悉浙西地理。畏不前。浙西五郡知兵之士。走越中者。不下數百人。咸願荷戟前導。則一便。夫雖多失事機。而尙有此七便。則非嘗試之說矣。驟得一邑。次第疾下。武林不戰自解。不然。杭□分心廣爲備。吾不得志。然則得志者。在江上之戰矣。蓋西征之著勝敗。皆有益也。若復忽忽五日之內。不見進兵。則可危者。萬萬必有。臣家旣已陷□。僅此勾踐故區。稍留清醒。而君子不競。至於一跌。主上爲大明之身。不止魯國分封故事而已。祈卽日勅行。

### 第三篇

臣之前疏。謂勢斷難姑待。懇另以兵行。誓不欲借題得官也。而輒荷特顧。命以監軍之銜。念自少年飢寒。長而辛苦。教授生徒。積勞所致。每患胃病。不任驅策。然不敢以疾辭也。臣辭。則誰敢以一矢加浙西城下者。而又未蒙另調何兵。臣乃自詣鄭定□。借兵一千。行且襲渡。第恐事機間於毫髮。而督遣不一奏報。遼闊必誤日期。乞假臣便宜行事。得盡專制浙諸軍。至設間行探。已發數十人往。其賞犒鼓舞之費。苦無所

辦念臣遁越時不忍明言傷老母之意但提一囊貯生平著述他無一錢而欲以空言賞人誰樂爲用伏  
懇主上俯念用兵以來唯此爲下手第一著立取內帑五百金賜臣任臣給發與印勅並下以便應期遄  
征國家從來誤於緩急二字著著妙算著著錯過臣欲力除此病先從此局始幸與呵護力行之

第四篇

前廿一日所遣偵子李志祥等已往彼中安置內應具報各縣情形如狀臣家有馬□來亦來收充邊外  
之產百人至老母驚投水幸負絮不沈臣念父棺未葬家屬咸在族間聚處墳墓相接或恐此未渡江彼  
先屠伐幸改臣姓從母氏氏沈稍示疑惑又前疏所懲給與生員宋恪等官銜未荷慨與夫優以虛名而  
使深入危地猶之勸人死而曰贈以美官此尙矜惜而欲令其楞腹以從事也卽周公孔子難之而況今  
之人乎今不敢望五百也卽以三百譬如令臣親偵□行渡海亦必與以道里費數金主上不能使臣猶  
臣之不能使健士也伏惟裁照

第五篇

臣得一人可與共爲攻得一人可與共爲守臣恭候費給且待舟楫踰期未行夫攻間之著以爲迂則已  
以爲切則當出全副精神注之朝廷不甚加意而欲求閩外之功難矣江上所靡巨萬此數百金而難之  
臣卽智勇百倍古人安得以飢渴勸人審浙西近狀斷宜智取不可力得中書張賁孫奇才也臣素服其  
經濟未獲謀晤頃□坐論儘多應變之能且弄槊如綫百射不能及也臣同籍董期生留心治亂積有年

載倣古寓農法便鄉自爲勇試團練已驗也生員諸來聘淹該古義才算敏贍無所不可試艱繁有綏靖之功此三臣者臣左右手也請得與偕行賚孫參帷幄期生練兵來聘理餉必有以不負臣舉幸勅下共西征之役更懇立督鎮臣孔思誠之師王朝先之師張鵬翼之師趙天祥之師次第至臣爲之先而諸軍爲後庶不至以臣嘗試以浙西嘗試以皇明二字嘗試也事關大計不勝眷眷

## 第六篇

臣奉命監軍西征而前此奉命監軍西征者故不喜臣言西征事臣以朝廷所策遣大將皆不果行不得已刺血作書告江上守臣刑部郎中錢肅樂感臣意爲涕下願率義兵二千人來共事且招沈馮二義師已有成算而不喜臣言西征者揚言臣欲以兵遮取家屬過越東夫以兵所以危家屬也不以兵或可竊渡無失算至是者臣不與辨乃錢與沈馮竟以不喜者力不果則止有鄭師千人汪秉珪二百人又錦衣朱壽宜破產餉師防江最早許以五百人從臣聽調度此月十四日遣中軍高允超移冊就點名已而誠十五日歸給餉十六日復至汎受計往時戒備矣潛諸邑爲內應者皆守是期勿敢忘則先自寧邑始忽壽宜故將趙凌雲以五百人夜潰去十六日朱師獨不至於是鄭汪二師亦皆疑徘徊不欲進失期會甚可惜也凌雲狡鷙不任使先是嘗領五百人聞欲西渡叛壽宜令不肯行壽宜黜之銜忿去從胡學海意誘此師不真西渡然後快是故夜乘允超歸就餉縛之獻學海而五百人率從胡臣念事已六七而疑沮者不可強甚矣借兵之不爲吾用也計部署策算將一月一旦壞凌雲手凌雲之肉不足食也伏乞主上

立置凌雲於法以警逆師責學海還壽宜兵及舟仗等物圖再舉臣札巖門以待命

第七篇

臣屯巖門收巖門百姓爲耳目探出沒則鄭定借師猶在也小壘距海寧三十里前者十六之期不果渡覺有內間者於是益兵守嘗以馬騎騁老鹽倉天開河喬司之間以作氣勢廿五日臣遣總兵顧石率三百人襲老鹽倉之營不備夜驚銃礮擊死三十餘活擒二并揭其示來臣非有發縱之力出義興方略也伏懇優與紀錄臣思斬馘之細不足爲功待命於此專候諸師而叛將趙凌雲尙未伏辜所潰師尙未遣還屢誤事莫此爲甚伏惟主上乾斷而行之念軍務冗沓不工副草幸與優異得徑達文書房微臣幸甚

第八篇

臣前借兵鮮受約束總不爲用臣乃使人行諜設間專待策應而召募得二百餘人如王鳳朱之彪韓萬象等皆鬪勇敢戰一往無悔誓不與俱生者臣又日與講論兵法呵其疾痛激其忠義誠可以爲先驅而苦奉命諸師斷斷不進主上重以丁寧不啻數十矣何食祿而不赴難臣知其意有不切而氣有所不敢夫諸臣擁兵咸得稱將軍懸黃金印呵道自爲雄亦何所不足而必力於原以試不測所爲意不切也諸臣皆不產浙西彼中情勢不諳又昧於兵法與農市等偵探二字向不任遣凡事不深習其故則疑而畏之且可以矯命推托非推托則何故不出此所謂氣有所不敢也嗟乎此日之餉不但民間肌髓國家

之命脈與之延促而但坐令糜耗果能久畫江也臣計則迂否則以分飽抗志請纓者或尚有可幸成也臣家浙西機情熟又素以恩結人故無不樂爲用附近府縣敵之虛實瞭如指掌又臣少年談兵以至於今用兵虛實得其大分嘗能以信義感激寮屬使弱者皆勇則何不幸與臣以專制之師臣察得新至之師其將未大者如尹自鵬千人李唐禧七百人嵊縣生員尹燦貢生喻恭復五百人又新安王撥歸熊督臣千人此皆非江上諸鎮額兵而將皆勇於功名遣令受臣節制必有大用且此三千餘人究不能空腹坐逍遙也與以半月之糧限日渡江得地會食則旣不分兵於諸鎮之手而取資糗糧萬不及方命西征者虛糜之多一月之內不見成功臣願立受褫斥以警諸臣之觀望不前者

### 第九篇

臣奉命監軍乞師不得又以奸弁潰軍致失機會疏請新兵聽臣專制尙在部議臣心憂結鬚髮俱禿臣惟戰浙西者必浙西之人內應外合無不成功臣鄉瀕海素有不奉官票私行鹽販者此其人皆剛狠欲逞太平之日嘗逆官府捕巡無如何則又僞爲巡鹽之牌以官而行私亦有頭領聽其指揮間爲不靖而地方不敢問蓋道里熟與□恆相遇不震其名又習水戰郡邑旣陷凡此不甘就□多登販舟卽世族貴胄往往然矣且自以爲忠義號令齊一竟若師旅臣已遣臣至戚生員孫旦復薙髮潛往招來且與太湖義旅呼應續又遣參將王鳳一再聯絡如海寧衛世襲指揮滿惟誠原任參將棄職潛販湯瑞麟原任都司今棄職潛生員胡士燦家姚欽明又起義董延貞曾殺□弁歐陽杰結衆潛行水澤又義士凌應章、玉

志麟、周紹賢、錢元、陸瀾等各有販舟共五六百號。每舟約十人，則五千餘人矣。皆願聽臣調度，爲中興良佐。在內接應，伏乞優獎，皆與職銜使整集器械，廣致銃礮。凡鄉集使氣任俠之輩，咸呼下舟。此輩單涼，一旦有榮秩快其所欲逞，而又美以義名，知踴躍任事，較浙東官兵無不一當百者。然非臣使必不爲用。臣少結客輕財貨，嘗提人患難，頗聞鄉里，故相信不疑。但彼父母妻子與其屋廬墳墓，皆在□朝發而夕不勝，則惴惴不保。故必以浙東官兵先之，又使彼有尊官兵之名，而易部署就吾使。然則官兵千人足矣。臣呼號數月，究竟商量，若失此機，真正可惜。萬乞立勅一師付臣疾行，勢必電摧禾吳，無堅不破。光復舊都，在此一舉。若又疑惑臣何苦捐棄家貲，以戚黨族屬試之不測之地，爲不返顧之計也。誠審之熟，而料之明切，萬萬不爽者矣。事在呼吸，不能姑待。

第十篇

臣惟今日西征二字爲絕佳題目，借以陞官挂印者，纍纍不一足矣。而責其速進，不曰請餉，則曰待舟。自舊歲九月至今，已五閱月矣。而必無持一載先登者，然此日時勢更與歲前不同。自十二月廿四之後，我兵一挫，□驕益逞，乃諸鎮養尊將心，萬不足恃。而私鬪者互見，無所爲兵律也。米價騰沸，過常數倍，財竭則內必變，民情已洶洶可慮。又外逼日至，叔父寡兄同室之愛，我無一恃，知不可以旦夕矣。而舉朝泄泄，猶然飾太平之容，豈以示□鎮靜，如謝安之於秦乎？臣未能爲之解也。臣數月以來，招置內應，臣兄□往來傳諭，云朝廷榮擢且至，欽劄下而迄今未經實付，則以爲給之人誰信我。夫事窮則當變計，勢促宜有

急圖於今日尙以浙西爲不足留意。則請先削臣監軍之銜。并收西征勅印。各官解散。可以省官。可以減餉。可以息擾。亦有數善。若以萬不宜緩。則奈何奉行累月。猶在築舍。機去勢散。不可復得。天下美善之數。不肯遲遲以待人也。是宜已其不欲進者。而鼓其欲進者。奪其不能進者。而加於能進者。一以示罪。一以勵功。夫賞罰不由我。而豈能有濟于封疆之故哉。但古人用將。必須敵所知名。而將所用兵。必須素所熟習。渡江之後。日處危地。危則計出。不則一蹶不可收拾。非如江上之戰。進則賭礮。退則安枕。工作捷書。好爲塗飾而已。游擊朱之彪者。故叛許多副將。以國故幸脫者也。爲人刻鷺有膽。百萬不懼。嘗以兵依定。鄭遵謙以其素縛之。欲盡於法。臣以其才可惜。使過勝於使功。尙或恩誼可結。爲脫之任以事。今彼往收舊部兵丁。蓋熟用聽使令也。乞加以副將軍之銜。使得行其躉治。而臣從中節制之。料不卽爲患。但慮成功之後。或煩聖意處分也。治奇病者以毒藥。此用飢鷹之時耳。臣苦措辦。已付行糧三百金。東義至潔口道里。須五六日知甚不足。萬不忍半塗棄之。伏乞立發千人半月之餉。以便師行事。係危切言。不擇詞。統惟睿宥。

### 第十一篇

殉兩都諸公已蒙贈加炳不可朽矣。□至武林。都有幽節。不勝收拾。臣居浙西。能詳言浙西。臣同籍舉人祝淵。天性慈惠至孝。友愛諸弟。卽喪庭瘠。幾不起。推多就寡。處貧泰然。顧視端好。不苟坐立。衣冠古道。凡有益於鄉者。無不爲之。嘗慕原任都察院今蒙優恤劉宗周之學術。而未得爲其徒。壬午。宗周以直不容。

淵冒不測抗疏救至蒙杖處幾死初未嘗一面也甲申之變布被藿食對人輒號慟勸勤王會南都嗣服迺止乙酉揚州陷愴然謂臣曰□卽渡江奈何淵生有日矣南都潰輒往往絕食家人力勸稍進逮杭□下令限日責朝淵輒行大號噴血滿地旣暈復甦曰吾獨不得安母地下作絕命詞一章閏六月之五日葬母歸時已羸甚幾斃復絕食盡遺有死忠死孝尋常事之句令其子毋讀書毋彰吾輕生狀又舉人陸鑑誼好學篤行聞東越起義渡江觀之見江上諸師徒粉飾無恢復之志依定西將軍張名振名振方奉征西之命逡巡不果悲憤甚歸故廬吾有死耳此不足恃也浹旬不進飲食遷者日至負榻一號不起海鹽縣生員曹鳳鳴爲人質厚不習世故居山中殊無異人人亦鮮知之者□卽澉浦所鄉之人曰□令削髮子猶未知法若何自全鳳鳴曰卽死耳鄉人固勉勿死繼時時說死字諸以爲言之輕此戲也須臾檀山松樹東枝有緣自盡者衆卽視之戲爲死語曹鳳鳴也臣門人生員沈陵初不識字工謳吟年十五見臣與四方從遊者日講貫曰吾亦欲爲制義頃刻成一篇示臣則雜歌詞其半頗有理趣臣告之曰獨不得入此等語迺折節讀書博洽有文名生質孱□至謀奮義臣笑曰汝弱不任荷戈毅然答曰吾此中強也走道臣荆本澈奉命一較截郭店一路勢不敵義兵咸走而陵獨殿不肯退遂爲所殺此三節者臣鄉目擊與傳聞不同臣方廣採節義等事以存野乘而逢主上發幽錄義敢不以聞伏乞分別褒卹以慰泉下又生員董仁與祝淵同學志行相得淵死負屍而哭曰卽以淵故株連勿避也生平抗直不阿不曲嘗以一言扶植人時衆義起與淵等破家合以援海寧今高臥深山不肯出臣謂如此臣者卽不錄其舉義

其恬淡之操足以風勵。幸加部銜。使得展其所學於中興鴻業。不無小補。此非臣私舉也。爲國家勵氣節。長功名。惟俯賜鑒照。

## 第十二篇

臣惟造國者貴審勢。今日之勢。戰勢非守勢也。勢無可守。故必戰。而戰浙西。所以戰江上。蓋羣然以此著爲當急務矣。而行之必有所先。昨者痛哭而陳。蒙主上動色獎諭。慘及左右。下臣疏戶兵二部速覆。乃臣待命又十餘日。未經部覆。臣惟整師大進。不可無臣。卽偏師密渡。愈不可無臣。何則。熟道里。悉人情。精偵探。投內應。布間諜。知兵敢戰。願爲諸軍之倡者。惟臣獨也。臣師一進。□分力以禦我。則武林單。□不分力以禦我。則蘇嘉絕。而臣所請餉二千金。乃必無所措。則是信臣者未至。而以向道內應等事爲無所藉。臣果若是。則征西之著。亦可以不取亟也。臣知處餉甚難。然早進征西將士一兩日。便足以應臣所請。濡遲累月。動以數萬計。究竟兵饑而難濟。是苦易而好難也。一旦內應不成。□嚴江上。而吾越米價騰涌。自相殘賊。大勢一去。□且坐而收之。此時欲令臣往。臣亦計窮。天下事尙忍言哉。臣領額兵二百人。向未叨主上一粟。今蒙合派。計一歲。令四千金。臣今僅取其半。是費二千兩。省二千兩。臣未嘗有取餉之名。并未嘗有取餉之實矣。乞立勅上。虞折差之中。扣給前數。勒限臣渡江之日。若復逡巡。急正臣罪。以警諸師。所不辭矣。

## 第十三篇

臣請餉二千金實先領六百金立製拒馬車五十乘竹銃五十門伏弩二百件燈籠絆索火藥鉛彈刀牌之類現可察驗約共費去三百餘金而暨陽之師不日即至應發不敷又奉命調度劉繼武五百人向不請糧欲就臣食合力西征臣何所辭伏懇再勅戶部必與全給令城外點名交發庶無冒餉之虞亦無曠日之慮又有懇者西渡之後凡守望呼應備理船隻整頓器械催督聲援必有一重臣主之坐鎮海上一路照應庶於進取有功原任浙江道監察御史任孔當向守濟寧斬□□用兵素著今以艱請天語慰留著令墨縗從戎堪任此職既便應援兼理餉事使之處處內鞏路路遙應臣等乃可以一意鼓行無迴顧之患則恢復拭目俟之矣

第十四篇

臣爲西征一著刺血拔淚數月於茲百貨千求措餉召募所遺朱之彪畢竟狼子逗遛暨陽部衆自雄不思赴汎殊非臣所薦引與朝廷倚任之意則臣罪當議也臣之錯舉罪亦不辭而副總兵王國仕則獨如臣令以三百人來據報的於本月十二日誓師赴汎若夫餉數不給而奉督行之旨則是閉門而求其出也夫同受征西之命彼有糜數縣之糧而誤半年之期者往往不可問果以督臣者并督諸臣臣願戴罪立功身當斧鎗不惜也臣念母在臣心在國倡義西征獨先聯絡內應有據如臣者豈有所畏而不前哉但兵到之日前數百金已飽原部則何所恃以無饑萬懇垂憐并給原數事已六七所爭不遠不勝惓惓

第十五篇

竊惟內應之設臣自去年十月以來破家聯絡人舟俱集激發最遠初有浙西內應之疏再有機間旣設之疏所懲給與空勅并實授欽劄以示鼓舞兩蒙諭旨而逡巡瞻閣歷今兩月尙未舉行夫用精神者養之而後出用氣力者疾速不停迺克大見今蠟丸之書一再至手蹟具在也文臣如某某等武臣如某某等行師在卽伏乞遵旨施行文則監紀通判推官等銜武則就部劄概與實授臣言歷今字字立驗並無誣罔祈刻日下部催行便臣密遣傳諭然後官兵到日處處響應無任激切



中華民國二十五年十二月初版

章

發行人

王 上海河南路五

印刷所

商務印書館

發行所

商務印書館

上  
海  
河  
南  
路

\*D六二九三

種三他其及議奏垣兩

編主五雲王

編初成集書叢



3
4
912